

## Mareko Yeng Yesuac Siduc Gombang Ohoec

<sup>1</sup> Yomoc Yesu Kristo Anutuac Medac, yeac siduc gombang hanahema fingerec, <sup>2</sup> imocac siduc. Profete Yesaiango yofi ohoec,

“Negenna, ni siduceddena sueba yeng waraigemma singga mengeregenude.  
*(Marekai 3:1)*”

<sup>3</sup> Nga bangec kisiu kpakpac mong yofi fingerude, ‘Ngeni KEBUAC sing wisima singa heitumeigec.’” *(Yesaia 40:3)*

<sup>4</sup> Yocac imocac sirihau Yohanengo haec. Hama bangec kisiu kecma ngicngac ubangina dzigeneu kopocsicngina kpac anudeac mitidoku nadzicgecdeac edekpou ayemmeec. <sup>5</sup> Nga ngicngac yeni Yudaia prowins nga Yerusareng taonnunac amanene yearu kenggec. Kemma kopocsicngina deficgemagec yeng Yodang dokuu namma doku nadzicyemmeec.

<sup>6</sup> Yohane ye ngakpia kamere dzoeango memea, imoc heima fadenga mong yangseberango memea, imocngo kebangau dzegeec. Amma ye ipua nga kateac kukundzau nekefec. <sup>7</sup> Ye ngicngac yocac yofi edekpou ayemmeec, “Ngc neac ngadeu haude, yeac kucngo neac kuc ferahade. Ni ifiango ngonducnema yeac hanitabea witiha yungecna naric mi ngereeude. <sup>8</sup> Ni doku nadzicngemmeduae nga yeng hama Tiri Asungo nadzicngemmeude.”

<sup>9</sup> Naso imohai Yesungo Nadzarete taong Gariraia bangec wama Yodang dokuu hasikeec. Hasikeu Yohanengo doku nadzicmiec. <sup>10</sup> Nadzicmiu Yesungo dokuunac eremanu imohaingoc kurumeng anggeu Asungo kebesacac sirc amma yearu mau henec. <sup>11</sup> Hemmanu kurumennunac enacudumeng mong yofi fingeru negenec, “Ge neac songomedacna, ni gengsongo anggenduae.”

<sup>12</sup> Nga imohaingoc Asungo Yesu sueu bangec kisiu kenec. <sup>13</sup> Kemma uameme 40 kecmanu Satanggo ye tobanggeec. Tobanggeu imohai kateyang yenigoc kecmanu angero yeneng heng-gareng ammigec.

<sup>14</sup> Ngic yeneng Yohane witicamau faigec tac-manu Yesungo Gariraia bangecfu kemma Anutuac siduc gombang edekpou ayemmema <sup>15</sup> yofi deec, “Naso bic hau Anutuac eucererenggo mewegenengunudeac ngeni ubangina dzigeneu siduc gombang negensinggeec.”

<sup>16</sup> Anu Yesungo Gariraia dzohong tegiau kengkecma Simong nga munea Anderea yerenu yeri ufcngira ukuma nanoc. Nocac yeri kondungyang meme ngic. <sup>17</sup> Yeremma Yesungo yofi edeyuruec, “Ngeri hama modacnuec ngic yeneng kondungyang meandae, ngeri ifi isoc ngicmeme ua meecdeac kpoungemeccade.” <sup>18</sup> Ifi deu yeri imohaingoc ufcngira wama Yesu modaroc.

<sup>19</sup> Nga yeni kapianec kemma Yesungo Dzebe-daioac medahora Yakobo nga munea Yohane yerenec. Yeri gombau ufcngira memengere

amma taroc. <sup>20</sup> Tarec yeng yeremma kpacyuruu yeri negenoc. Negemma imohaingoc mangngira Dzebedaio nga ua ngicfora gombau tacmagec wayunuma Yesu modaroc.

<sup>21</sup> Anu yeni Kafanaung taonnu kensikegec. Kensikemagec sabata naso anu Yesungo kpekpeturang amau emma Anutuac yoac kpouyemmeec. <sup>22</sup> Kpouyemmeu ngicngac yeneng kpoukpouyoara negemma imoc negenggec engena anec. Ye kpouyemmeec, imoc ngic uakibi mekecdae, yeneac siricfu kuhagoc amma mitiac negen negengngic yeneac dede isoc mi deec.

<sup>23</sup> Anu naso imohaingoc kpekpeturang amau ngic mong asu seuhagocngo tacma arohoc.

<sup>24</sup> “Yesu Nadzarete mingina, neneac wiac imoc geac mi ande. Ge memanganenununadeac hanec me? Ni gensiduaenoc, ge Anutuac kpetiac ngic.” <sup>25</sup> Ifi deu Yesungo asu seuhagoc ngaba ammima yofi edeec, “Ge waickema ngicfunac erema kenna!”

<sup>26</sup> Ifi deu asu seuhagocngo ngic mekpefac ammima kucgoc arohoma erema kenec. <sup>27</sup> Kenu ngicngac sasawango kerecgec amma yenaocngoc kpesiemegec, “Imoc noc wiac? Imoc kpoukpou gboria nga yeng ua minginaac kuhagoc kpounemmeu asu seuhagoc ifingoc yoac edeyunuu yeni yoara negemma tofohogec.” <sup>28</sup> Nga siduhango Gariraia prowinsiu bic kemma sokodarec.

<sup>29</sup> Anu yeni kpekpeturang amaunac mama Yakobo nga Yohane yerigoc Simong nga Anderea yereac amau kenggec. <sup>30</sup> Kemma enggec, imohai Simong sefena sebigerec ammiu feec, imoc Yesu edegec. <sup>31</sup> Edegec Yesungo yearu kemma

mariau mema miaru imohaingoc hafeia kpac anu yenenggareng ayemmeec.

<sup>32</sup> Ifi anu wenac kiwa kemeu ama tofore hamanu ngicngac yeneng hafeigoc nga hadehade amma yafingoc sasawa Yesuaru meyunu kenggec. <sup>33</sup> Nga taonggac ngicngac sasawa yeni ama naguyau kpedzucnegec. <sup>34</sup> Kpedzucnemagec Yesungo ngicngac hafeingina hania haniagoc mengereyunuma hadehade nga yafingngina homac kporarec. Nga hadehade nga yafing kporacyunuec, yeni haniaya negenggecac yoac degecdeac dederac ayemmeec.

<sup>35</sup> Anu ama mi wereckemmanu Yesungo kundunnungoc yacma ama wama bangec botuc mong ngiha kpacfu kemma numuec. <sup>36-37</sup> Numuu Simong nga tosofora yeni ye hofockemma meficgema edegec, “Ngicngac sasawango ge hofocgudae.” <sup>38</sup> Ifi degec yofi edeyunuec, “Nenang taong goa wegenac tackende, imohai ifingoc kemma yoac edekpou ayemmedade. Nocac ua imocnoc mebadeac hadua.” <sup>39</sup> Ifi deu yeni Gariraiia bangec yerecge kenggec. Kemma kpekpeturang amasoc yeng yoac edekpou ayemmema hadehade nga yafing kporacyunuec.

<sup>40</sup> Anu ngic kubecserigoc mongngo yearu hama fafoc heima desambic ammima deec, “Geng negenna naric anu naric medzuacnubang.” <sup>41</sup> Ifi deu Yesungo ubea manganeu maria sinema ngic kpeserema yofi deec, “Ngereenadeac songona fede.” <sup>42</sup> Demanu imohaingoc kubeha mosiu sebia ngereec. <sup>43</sup> Ngereeu Yesungo ngic derahema suema yofi deec, <sup>44</sup> “Negenna, sebigau faka fingecdac, imocac ngic mong mi edebesena. Ge

womong gareng yearu kemma sebiga edzahema Mosengo seseac deec, imocac sirihau modacma faibesena! Ge ifi faina yeneng sesega hemma negentegecgecde.”<sup>45</sup> Ifi deu yeng ine kemma siduc imoc sifu deyadiec. Imocac amma Yesungo taonnu fingec fingec monggoc mi enec. Ye ine ngadeau bangec kisiu kecmanu ngicngac noboc nobocnacngo yearu hakecgec.

## 2

<sup>1-2</sup> Uameme goa wisickemanu Yesungo monggoc Kafanaung taonnu kenec. Kenu ngicngac homacngo imoc negemma ama wakema naguya hedzickemagec yeng Anutuac yoc edekpou ayemmeec.<sup>3</sup> Ammanu ngic<sup>4</sup> yeneng ngic mong hanimaria homemea tofohoma yearu mekenggec.<sup>4</sup> Mekenggec ngic homacngo nanggecac hoangau faigecdeac obohoma ama witiau enggec. Emma ama bubuya meickegec titinga fingerec. Fingeru yeni Yesu nanecfu imohai ngicpuring dzakeagoc faigec kemeeec.<sup>5</sup> Kemeu Yesungo negen negensingngina hemma ngicpuring yofi edeec, “Medacna, kopocsicga bic wawaya.”

<sup>6</sup> Ifi deu mitiac negen negengngic goa ihai tacgec, yeneng ubanginau yofi negenggec.<sup>7</sup> “Ngc imoc ye nocac yoc ifi dema Anutu emmide! Anutu mocgungo kopocsic naric waude.”

<sup>8</sup> Yeni ifi negenggec Yesungo ongaasuyau negengyemmema yofi edeyunuec, “Ngeni nocac negen negeng ifia ubanginango negensidae?<sup>9</sup> Damocngo efea ande? Ngic puring yeac debesonga, ‘Kopocsicga kpac ande’, me ‘Ge yacma

tofoga mema kenna.’ <sup>10</sup> Nga Ngicac Medac, yeng bangecfu kopocsic wawaac uayoac nga kuc femide, ngeni imoc negenggecdeac amma yofi deba.” Ye ifi dema ngicpuring yofi edeec, <sup>11</sup> “Ni edeguduae, ge yacma dzakega mema amagau kenna.” <sup>12</sup> Ifi deu imohaingoc ngic ye yacma dzakea mema ngicngac kicnginau kenec. Kenu ngicngac sasawango imoc hemma kpidohoma kerectegec amma Anutu dengerema degec, “Wiac yomoc mi hehennina yaguc fingeru hendimbe.”

<sup>13</sup> Anu Yesungo ama imohanac mama dzohong tegiau kenec. Kenu ngicngac homacngo yearu kenggec kpoukpou ua meec. <sup>14</sup> Nga kemma Rewi Arifaioac medac takesimeme ameau taru hemma yofi edeec, “Ge hama ni modacnuna!” Ifi deu yeng yacma modarec.

<sup>15</sup> Kecma Yesungo Rewiac amau yaka nema tacmanu takesimeme ngic nga manganameme ngic homacngo Yesu nga medacfora yenigoc yaka momoc negec. Ngic ifia homacngo yeni modacyunuma kenggec. <sup>16</sup> Ifi anu Yesungo takesimeme nga manganameme yenigoc tacma yaka neu farisaio yenearunac mitiac negen negengngic goa, yeneng imoc hemma medacfora kpesiyemmegec, “Ye nocac takesimeme nga manganameme yenigoc yaka nede?” <sup>17</sup> Ifi degec Yesungo negemma yofi edeyunuec, “Ngicngac hafeingina kpac kecdac, yeni dotaac mi ayemmeude. Nga hafeinginagoc, yeneng ine dotaac ayemmeude. Nga ni ngicngac dindingac kpacyunubadeac mi mayai, kpac. Ni ine manganameme ngic kpacyunubadeac mayai.”

<sup>18</sup> Yohaneac medacfora nga farisaio yakasege kecandae, yeneacunac goango hama Yesu kpesimigec, “Yohane nga farisaio medacfocongina yeni yakasege angandae. Nga geac medacfocongina yeni yakasege angandae?” <sup>19</sup> Ifi kpesigec Yesungo yofi edeyunuec, “Memeturang ngicngo tosofora yenigoc taru yeneng yakasege naric mi kecgecde. Monggoc deba, yeng yenigoc tacmanungoc yakasege naric mi kecgecde. <sup>20</sup> Kecma naso monnu ngic yeneng memeturanggac ngic yeneacunac meickegecde, naso imohai yakasege anggecde.

<sup>21</sup> Ngac mongngo ngakpi eseau kporucsusuc gboria mong mi kpebiude. Kporucsusu gboriango esea taiu dzamema titingtoa fingebac. <sup>22</sup> Nga ngic mongngo waing gboria bokong yang seberango memea eseau naric mi kpeu kemeude, kpac. Waing gboriango bokong esea tindziru yerahafoc manganebaoc. Imocac waing gboria imoc bokong gboriau kpeu kemeude.”

<sup>23</sup> Naso monnu sabata nasou Yesungo wit ua dzongiau sing modac kemmanu medacfora yeneng wit fora mocgu mocgu merecgema megec. <sup>24</sup> Merecgegec farisaio yeneng degec, “Henna, yeni nocac sabata nasou faka mi angana andae?”

<sup>25</sup> Ifi degec Yesungo yofi merengyemmeec, “Dawidi nga uamedacfora yeni yakaac obohoma herenginaac homema faka anggec, ngeni imoc osonegeng mi angandae gedang. <sup>26</sup> Abiatango womong garengtoa kefec, naso imohai Dawidingo Anutuac womonnu enec. Emma ic sogong Anutuac sese faifaia, imoc menema uamedacfora

ifingoc gumecyunuec. Nga ic sogong imoc womong gareng yenengsac naric negecde, ngictehec yeneng kpac.” *(1 Samue 21:1-6)*

<sup>27</sup> Ifi dema yofi edeyunuec, “Ngicngo sabataac amma mi fingerec, sabatango ine ngicngac nge-neac amma fingerec. <sup>28</sup> Ngicac Medac ye sabataac Kebu kecdengoc.”

### 3

<sup>1</sup> Yesungo nasou monnu kpekpeturang amau enu ngic mong maria noboc homemea, ye ihai tarec.

<sup>2</sup> Nga ngic goa yeni Yesu yoacfu faigecdeac negengsigec amma ngic imoc sabata nasou mengereude me kpac, imocac hembikecgec. <sup>3</sup> Hembikecgec Yesungo ngic marimangang yofi edeec, “Ge yacma botucninau nanna.” <sup>4</sup> ifi dema yofi kpesiyem-meec, “Sabata nasou noc faka naric ambesonga, faka gombunga me mangana? Amma homebeso andae, yeni agengngina tinide me yunuhomene?” Ifi deu yeneng engsac ning kpegec. <sup>5</sup> Ning kpegec yeng ubasinginaac negenghodungaima herea buu kic fikengfiha amma ngic yofi edeec, “Ge mariga sinena!” deu ngic ye maria sineu ngereec. <sup>6</sup> Ngereeu farisaio yeneng nasou imohaingoc Herodeac arengfora yenearu ioha kemma dafiu mema kpegecdeac yoac dedzege anggec.

<sup>7</sup> Anu Yesu nga medacfora yeni amabangec wama Gariraia dzohonnu kemmagec Gariraia bangecfunac habu kunengngo modacyunugec. <sup>8</sup> Ngicngac Yudaia bangecfunac nga Yerusareng taonnunac amma Idumaia bangecfunac nga Yodang edibigeng amma Tiro nga Sidong bangec-



funac, habutoa imoc yeni Yesungo faka sasawa meec, imocac siduc negemma yearu hagec.

<sup>9</sup> Nga Ngicngac homacngo hasikema Yesu igockebauac medacfora yeneng wage wegenac faigecdeac edeyunuec. <sup>10</sup> Nga ye ngic homac

mengereyunuu hafeigoc yeneng kemma kpeseregecdeac hefacemegec. <sup>11</sup> Nga asu

seuhagoc yeneng Yesu hemma ngonducnema yofi dema kpacma degec, “Genoc Anutuac medac.”

<sup>12</sup> Ifi degec hania dekperagibauac Yesungo dederac ayemmeec.

<sup>13</sup> Anu ye tikiu emma medac goa ubango negenggosi ayemmeecmoc, deu yearu kenggec.

<sup>14-15</sup> Kenggec medac 12 meisingyunuma aposoro kpac yemmeec. Yemmeu yeni yegoc kecmagec yoac edekpou ayemmegecde nga hadehade nga yafing kporacyemmegecdeac uayoac nga kuc yemmeec.

<sup>16</sup> Ngic 12 meisingyunuec, yeneac kpacngina yofi, Simong, kpara mong Petoro miec, ye <sup>17</sup> amma Dzebedaioc medahora Yakobo nga munea

Yohane, yereac kpacngira Boanerges yemerec. Imocac titiha, parandangac medac. <sup>18-19</sup> Nga

Anderea amma Firipo nga Batoromaio amma Mataio nga Toma amma Yakobo, imoc Arifaioac medac nga Tadaio amma Simong Kananaio nga Yuda Karioto amaunac, yeng kecma Yesu kerereu megec.

<sup>20</sup> Anu Yesungo amau kensikeu habutoango hama kpedzucnegec medacforagoc yakaneneac titing mong mi fingerec. <sup>21</sup> Wiacfora yeneng yofi negenggec, “Ye ubea sufude.” ifi dema megecdeac kenggec.

<sup>22</sup> Nga mitiac negen negengngic Yerusarennac hagec, yeneng degec, “Ye hadehade nga yafing yeneac ngictaungina Bedzeburu, yeac kucfu hadehade nga yafing ngicngac yeneacunac kporacande.” <sup>23</sup> Ifi degec Yesungo kpacyunuma yoac heima yofi edeyunuec, “Satang yengenaocngoc dafi kporacemeude? <sup>24</sup> Bangec monggac ngicngac yeni ngaba angemema tohogecdeu bangec imocngo naric mi fekefude, kpac. <sup>25</sup> Nga amamana mocgungo tohoma ngaba angemeudeu amamana imocngo kpac anude. <sup>26</sup> Nga Satangngo tohoma yengenaocngoc kporacemeudeu ye ifingoc kpac anude.

<sup>27</sup> Ngic mongngo ngic kuhagoc, yeac amau emma iwaiya naric mi wangerude, kpac. Ye ngic kuhagoc imoc witickemaguc amea manau emma iwaiya tacde, imoc naric wangerude.

<sup>28</sup> Foracngoc, ngicngac yeni kopocsic hania hania angandae nga wiac hania haniaac deendema nga dedenggbaring angandae, kopocsic ifia sasawa, imocac wawa fede, imoc edengunuduae. <sup>29</sup> Nga ngic mongngo Tiri Asu denggbaringgeude, yeac kopocsic ine wawaya mi fede. Kopocsihaac turunga imoc fekengkecbesande.” <sup>30</sup> Yeneng degec, “Ye asu seuhagoc.” imocac amma yeng ifi edeyunuec.

<sup>31</sup> Anu Yesuac nonggo munafora yeneng sobennu kensikema ngic mong suema degec, “Yesu ye mabeso.” ge ifi edena. <sup>32</sup> Ifi degec Yesungo habu yeneac botucfu tacmanu ngicngac yeneng edegec, “Nonggo munafocga ngadeau namma ge hofocgudae.” <sup>33</sup> Ifi degec yeng merengyemmec, “Damoc yeneng neac nonggo

munafocna?” <sup>34</sup> Ifi dema yegoc momoc tacgec, kiwa yenearu fima yofi deec, “Nonggo munafocna imoc ngicngac ngeni yomoc tacdae. <sup>35</sup> Nga ngic Anutuac songo nga negen negeng modacma yeac ua mekecdae, yeneng neac nonggo naing nga dacmunafocna.”

## 4

<sup>1</sup> Yesungo dzohong tegiau monggoc kemma ngicngac edekpou ayemmeu homacngo yearu kpedzucnema hagec. Imocac yeng gomba monnu emma ihai tacma edekpou ayemmeec. <sup>2</sup> Amma ye yoac heima yoac homac kpouyemmema yofi deec,

<sup>3</sup> “Negenggec, gbome kpegi kpegingic mongngo gbomea kpegiudeac uau kenec. <sup>4</sup> Kemma kpegiu gbome goa mama sinnu heiu neng yeneng hama nedagec. <sup>5</sup> Nga goa harongannu heiu ihai bangec efeanec feecac gbome imoc bic nemonggema ereec. <sup>6</sup> Erema godea ine homac mi faiecac wenacngo erema kpeu gbome imoc ururuema homeec. <sup>7</sup> Nga gbome goa haseng manau heiu hasengngo yadima heihomeu fora kpac anec.

<sup>8</sup> Nga gbome goango bangec gombungau heima kpea nemonggema fora gombunga anec. Monggac imoc gbomea 30 nga monggac 60 amma monggac 100, ifi fingerec.” <sup>9</sup> Yesungo ifi dema yofi edeyunuec, “Kedzahagoc yeng yoac yomoc negembeso.”

<sup>10</sup> Anu ngicngac habutoa kenggec medacfora 12 nga ngicngac goa yegoc kecgec, yeneng yoac heihei imocac hania Yesu kpesimigec <sup>11</sup> yeng yofi

edeyunuec, “Anutuac eucererenggac negen negeng sufu sufuya, imoc ngeni bic ngemmengemea. Nga ngicngac ngadeau kecdae, yeni ine yoac heiheiusingsac yoac sasawa negenggecde. <sup>12</sup> Ifi anu

‘Yeni kicnginango hemma wiac mong ine mi henggecde nga kedzacnginango negemma wiac mong sifu mi negentegecgecde. Imocac yeni ubangina mi dzigeneu kopocsicngina kpac ambacac kopocsic wawa mi anggecde.’ ” *(Yesaia 6:9-10)*

<sup>13</sup> Anu Yesungo yofi edeyunuec, “Ni yoac heima deduae, ngeni imocac hania mi negendaeu yoac heiheiac hania goa monggoc deba imoc ifingoc dafi negentegecgecde. <sup>14</sup> Gbome kpegi kpegi ngicngo Anutuac yoac kpegiec. <sup>15</sup> Gbome sinnu heiec, imoc ngic goa yeni yoara negenggec nga Satang ye ine bic hama gbome ubanginau kpegi kpegia meickeude.

<sup>16</sup> Nga gbome harongannu heiec, imoc ngic goa Anutuac yoac negemma heresongogoc bic hoanggecgecde. <sup>17</sup> Amma yoac ubanginau godea mi meecac naso wegenanecsac taru Anutuac yoacac amma kpendzeng me yunukporac faka fingeru yeni makpegecde.

<sup>18</sup> Nga gbome hasennu heiec, imoc goa yeni Anutuac yoac negenggec. <sup>19</sup> Negemma bangectoa bangec yomocac kekecac fagung nga dzofinacac faitobang nga wiac goaac hensongo angandae, imoc sasawango ubanginau kemema yoac heihomeu fora mong mi fingerude.

<sup>20</sup> Nga gbome goa bangec kerehagocfu heiec, imoc ngic goango Anutuac yoac negemma

mekecgec fora fingerude. Goango 30 nga goango 60 amma goango 100 meficgeude.”

<sup>21</sup> Yesungo monggoc yofi edeyunuec, “Ngic mongngo kifa kpiacma pake bageau faima mi kperahaude me tatac bageu faiu tarude, imoc kpac. Kifa imoc tatahau faini tacande. <sup>22</sup> Wiac sufu sufuu fede, imoc kecma didiu fingectegerude nga wiac seme semea, imoc kecma kperagiau fingectegerude. <sup>23</sup> Mong ye kedzahagocngo yoac yomoc negembeso.”

<sup>24</sup> Amma Yesungo yofi edeyunuec, “Ngeni yoac yomoc negentegecbisia. Ngeni wiac kpetea isinggema ngicngac yemmeandae, ngic yeneng kpete siriha ifiangoc isinggema turung kpoungemmegecde. Yeni kpoungemmema imocac siriha meemma monggoc ngemmegecde. <sup>25</sup> Imoc yofiac, mong ye wiac goa femide, ye wiac monggoc migece. Nga mong ye wiac mong mi femide, yearunac wiacbisic femide, imoc ifingoc wangece.”

<sup>26-27</sup> Amma monggoc yofi deec, “Anutuac eucererenggac siriha, imoc ngic mongngo gbome kpegiec, ifi isoc. Kpegiau hadzing toforec feyac ammanu gbome imoc nesarima ereude. Nga imoc dafiac erede, imoc ngicngo mi negentegecde. <sup>28</sup> Nga bangec yengenaoc wiac meyadiu erema tebang angkecde. Amma fora amma wadzima kpauueude. <sup>29</sup> Kpauueu fora kpememe naso anu ye semeng bic kperecgeude.”

<sup>30</sup> Yesungo monggoc yofi deec, “Nenang Anutuac eucererenggac siriha yofi heima deni naric anude. <sup>31-32</sup> Anutuac eucerereng imoc mastet

gbomea isoc. Mastet gbomea imoc gbome sawa yeneac kapiangina. Nga imoc bangecfu faini erema yadima semeng uaac mondzang feracyunuma fawa kuneng angande. Nga sawau neng yeneng imocac nokumucfu hama faec heima tacgecde.”

<sup>33</sup> Yesungo yoac heima yoac ifia homac dema ngicngac negen negengnginaac sirihau Kebuac yoac edeyunuec. <sup>34</sup> Amma yoac deec, imoc ine yoac heimasac edeyunukefec. Edeyunuma medacfora meyunuma tembuclu kemma hania dekperagima edeyunukefec.

<sup>35</sup> Anu ama marai anu Yesungo medacfora yofi edeyunuec, “Nenang dzohong noboc kenni.”

<sup>36</sup> Ifi deu yeni ngicngac habutoa wayunuma Yesu gombau bic tacmanu yeni ye wangepma kenggec. Kemmagec gomba goango ifingoc modacyunugec. <sup>37</sup> Nga imohai firang engena kpeu tembong kucgoc kpeu dokungo gomba manau erema gomba mewakebeso anec. <sup>38</sup> Anu Yesungo gomba ngadeau kparicgang heima gau femanu medacfora yeneng midima degec, “Kpoukpou, kemebesonga andimbe, ge imocac fagung mong mi annec me?” <sup>39</sup> Ifi degec ye gauunac yacma firang kpetarimima dzohong yofi edeec, “Ge waickema fena!” ifi deu firang kpac anu dzohong imoc ning kpema eng fec.

<sup>40</sup> Feu Yesungo medac yeneac yofi deec, “Ngeni nocac kengec andae, negen negensingngina mong mi fede me?” <sup>41</sup> Ifi deu yeni kengec nga damutoa yombong amma kpesiemegec, “Ye noc ngic, firang nga dzohongtoa yereng yeac enac tofohodape.”

## 5

<sup>1</sup> Anu dzohong ferecgema Gerasene bangecfu edigeng kenggec. <sup>2</sup> Kensikema Yesungo gom-baunac mamamu ngic mong asu seuhagocngo kicsereunac hama Yesu meficgeec. <sup>3</sup> Ngic imoc ye kicsereu feyac angkefu ngic mongngo ye witickeudeacsoc mi anec. Nga yeni sengngo witickebeso ifingoc obohogec. <sup>4</sup> Ngic yeni naso homac hanimaria sengngo witickegec yeng seng kperecgedarec nga hania aiengngo witickegec, imoc ifingoc kperecgedarec. Nga ngic sasawa yeni ye mendanggegecdeac obohogec.

<sup>5</sup> Ngic imoc ye hadzing toforec kicsereu nga fagannu arohoma yengenaoc sebia hocfu heiherecge angemekefec. <sup>6</sup> Amma ye hereaungoc Yesu hemma nedzikemma haniau makpeec. <sup>7</sup> Makpema seriangoc arohoma deec, “Yesu Anutu engenatoaac Medac, neac wiac imoc geac mi ande. Ni Anutuac kicfu edeguduae, ge kpendzennu mi fainuna.” <sup>8</sup> Yesungo asu seuhagoc kporaru yearunac erema kenudeac edeec, imocac amma ngicngo ifi deec. <sup>9</sup> Ifi deu Yesungo yofi kpesimiec, “Ge kpacga merac?” kpesimiu deec, “Ni kpacna habutoa, nocac neni homac.”\* <sup>10</sup> Ifi deu ye kporacyunuu bangec imoc mi wagecdeac seriyombonggema derecgeec.

<sup>11</sup> Anu bangec botuc imohai berechabutoa mong fagang wegenacfu surukpema kecgec. <sup>12</sup> Kecgec asu seuhagoc yeneng yofi dema desambic ammigec, “Ge suenununa berecfu

---

\* **5:9:** “Kpacna Region” deec. Region imoc ami areng mong kpetea 5 tauseng me 6 tauseng.

kemeni.” <sup>13</sup> Ifi degec Yesungo negengyemmeu yeni ngicfunac erema berechabu yenearu kemegec. Kemegec berec yeni fagannunac nedzima dzohonnu kemema doku nema homedagec. Nga berec homegec, yeneac kpetengina imoc 2 tauseng isoc.

<sup>14</sup> Anu berecgareng yeneng kengec worama taonnu nga amabiscifu ngic kecegec, yenearu kemma faka fingerec, imocac siduc edeyunugec yeneng imoc hengecdeac hagec. <sup>15</sup> Nga yeni Yesuaru hasikema henggec ngic hadehadhabugoc warac kefec, yeng negentegecma wamba heima taru yeni ye hemma kengecyunuec. <sup>16</sup> Nga ngic kicnginango faka imoc henggec, yeneng ngic hadehadegoc, yearu faka fingerec nga berec yeneac siduc momoc ngicngac ayemmegec.

<sup>17</sup> Nga yeni yoac imoc negendacma Yesungo amabangecngina waudeac edegec. <sup>18</sup> Ifi edegec ye gombau emmanu ngic hadehadegoc ngereec, yeng yegoc kenudeac derecgeec. <sup>19</sup> Derecgeu Yesungo ine kpetarimima yofi deec, “Ge amagau kemma Kebungo geac ubea manganeu wiac sasawa anggencac, imocac siduc tosofocga ayamebesena.” <sup>20</sup> Ifi deu ye kemma Yesungo faka sasawa yearu meec, imocac siduc Dekaporisi bangecfu ngicngac yoac dekperagiyemmeu yeni imoc negemma kerecgec anggec.

<sup>21</sup> Anu Yesungo gombau emma monggoc dzohong ferecgema hasike nammanu ngicngac homacngo yearu heockema kemma kpedzucnegec. <sup>22</sup> Kpedzucnemagec kpekpeturang amaac gareng mong kpara Yairo, yeng hama Yesuac haniau makpema desambic



amma deec, <sup>23</sup> “Naroanna homebeso ande. Ge hama marigango witiau faina ngereeu de.”  
<sup>24</sup> Edeu negemma kemmaec ngicngac habutoango hefacemema yearu hagec.

<sup>25</sup> Anu ngac mong ihaingoc nanec, ye sacherec amma kecmanu kifa 12 bic anec. <sup>26</sup> Amma ye kpendzeng kpema dota homac yenearu kemma hiedzoya eng kpedzonggeu sebiau ngerec ngeree mong ine mi fingecmiu eng monggoc manganeec. <sup>27-28</sup> Amma ngac imoc ye Yesuac siduc negemma ngicngac ngadenginausing kemma yofi negenec, “Ni ngakpia kpeserema ngereebadenoc.” ifi negemma Yesuac ngakpihereha kpesereec. <sup>29</sup> Kpesereu imohaingoc sawa gbanggeu sebiau nomanu kpendzenga kpac anu negenge-meec.

<sup>30</sup> Nga Yesungo yofi negenec, kucna tosea fercedgad, imocac amma habutoa yenearu dzigenema yofi kpesiyemmeec, “Merang ngakpina kpeseredac?” <sup>31</sup> Ifi deu medacfora yeneng degec, “Ngicngac homac yeneng hefacgumagec geng merang kpeserenude dema kpesinec, imoc mi heide.”  
<sup>32</sup> Nga Yesu ye ine ngacngo kpesereec, ye hentegeudeac fikengfiha anec. <sup>33</sup> Ammanu ngac ye kengec kpeu dzonoma fedeu Yesuac haniau makpema haniaya hafoangoc deficedgarec, nocac sebiau faka fingerec, imoc negenec. <sup>34</sup> Deficgeu Yesungo yofi edeec, “Naroang, negen negensingango mengeregudac. Ge sebiga ngereeu ruaegoc kenna!”

<sup>35</sup> Anu Yesungo yoac denammanungoc ngic goa yeneng kpebung garenggac amaunac hama Yairo edegec, “Naroangga bic homedac,

kpoukpou monggoc ebic mi mina!” <sup>36</sup> Ifi degec Yesungo yoacngina wama gareng yofi edeec, “Ge mi kengecguu, eng negensinggena.”

<sup>37</sup> Ifi dema habu kpetariyemmema Petoro nga Yakobo amma munea Yohane, yeni meyunuu kenggec. <sup>38</sup> Kemma garenggac amau kensikema henu ngicngac habu yeni ubahodung amma kpeborongtoa kpema kiacsonggong anggec.

<sup>39</sup> Nga Yesungo ine ama manau emma ngicngac yofi edeyunuec, “Ngeni nocac kpeborong kpema kiacdae? Naroang ye mi homedac, ye gau fede.”

<sup>40</sup> ifi deu yeni dzomoremigec. Yeng ine ngicngac sasawa kporacyunuu ngadeau madacgec. Magec naroanggac nonggomama nga medacfora harebec meyunuu naroang feec, ihai enggec. <sup>41</sup> Emma mariau mema yofi edeec, “Tarita koumi!” imocac titiha yofi, “Ngachisic, ni edeguduae, ge yacna.”

<sup>42</sup> Ifi deu naroang ye imohaingoc yacma kengha anu yeneng hemma kpidohoma negenggec imoc wiac engena anec. Naroang imoc ye kifaya 12 anec. <sup>43</sup> Nga Yesungo faka fingerec, imoc mi deficgegecdeac seria deracyunuma naroang yaka migec neudeac edeyunuec.

## 6

<sup>1</sup> Yesungo bangec imoc wama yengena amabangehau kenu medacfora yeneng modacgec. <sup>2</sup> Nga sabata naso anu ye

kpekpeturang amau emma ngic edekpou ayemmu ngicngac negemma tacgec yeneng kerectegec amma degec, “Negen negeng imoc merang kpoumiec nga uayoac merang miecac mariango faka kuhagoc ifia mekecde? <sup>3</sup> Ye

Mariaac medac nga amamemengic. Ye Yakobo nga Yosec amma Yuda nga Simong yeneac dacngina nga naingfora yeni nenanggoc kecdae.” Yeni ifi dema dehesi amma wagec.

<sup>4</sup> Nga Yesungo yofi edeyunuec, “Profeteac amafora nga sactosofora amma arengfora, yenengsac yeac ewea mi heiandae.” <sup>5</sup> Nga ye faka kuhagoc mong yenearu meudeacsoc mi anec. Ye ngic hafeigoc mocgu mocgusac mariango kpesereyunuu ngereegec. <sup>6</sup> Nga yeni mi negensinggegecac negenu naric mi anec. Amma ye guruama tackenec, imohai yerecgema edekpou ayemmeec.

<sup>7</sup> Yesungo medacfora 12 kpacyunuma yohockang yohockang hendzicyunuma asu seuhagoc kporacgecdeac uayoac nga kuc yemmema sueyunuec. <sup>8</sup> Amma yeng yofi dema dederege ayemmeec, “Ngeni singgac mefic mong mi mema yasusac mebisia. Ngeni yaka me hie mi mebisia amma dzo mong fadeng nabehau mi baribisia. <sup>9</sup> Ngeni hanitabe faima ngakpi yohockang ine mi mekembisia.” <sup>10</sup> Ifi dema yofi edeyunuec, “Ngeni kemma ama monnu kensikegec ngic yeneng ama heingemmegec ngeni ama imohai tacyac angkecgec wisickeu wama amabangec monnu kembisia.

<sup>11</sup> Nga amabangec monnu kenggec ngic yeni mi hoangngunugecde amma yoacngina mi negenggecdeu ngeni haninginaunac yube kpegec mau amabangec imoc wabisia. Nga ngic yeni imoc hemma haniangina negentegecbisia.”

<sup>12</sup> Yesungo ifi deu yeni kemma ngicngac

ubangina merenggecdeac Anutuac yovac edekpou ayemmegec. <sup>13</sup> Amma yeni hadehade nga yafing homac kporacyunugec nga ngicngac hafeigoc kerecngo nadzicyemmema mengereyunugec.

<sup>14</sup> Yesuac siduc imoc bangeha bangeha sokoma kenu ngictau Herodengo yovac imoc negemma yofi negenec, “Yohane dokunadzicngo homecfunac gborima yarecac amma faka kuhagoc meudeac kuc femide.” <sup>15</sup> Ifi degec ngic goa yeneng degec, “Imoc Eria.” nga goango degec, “Ye profete. Profete warac kecegec, yeni isoc.” <sup>16</sup> Anu Herodengo ine yovac imoc negemma deec, “Yohane ubea kperecgeai, yennoc gboriec kecede.”

<sup>17-18</sup> Nga Herodengo munea Firipoac enema kpara Herodia, ye hamangec mema mekefec. Faka imocac amma Yohanengo Herode yofi edeac, “Ge munagaac enema menec, imoc singngo mi dede.” Ifi deu Herodengo ngicfora edeyunuu Yohane mema witickema witicamau faigec. <sup>19</sup> Anu Herodiango Yohaneac herebu negenec. Negenu Herode ye ine Yohaneac kengec kpeu garenggeecac amma Herodiango kpeudeac sing obohoec. <sup>20</sup> Imoc yofiac, Yohane ye ngic dindigac nga kpetiac, Herodengo imoc negentegecma henggareng ammikefec. Amma ye yeac yovac negemma naso homac negengyohoc meficgema sifu yoara negenudeac ammiac.

<sup>21</sup> Kecma Herodiac naso gombunga mong yofi fingerec. Herodengo fingec fingec nasoyau ngickuneng yeac bageau kecegec nga wasaingicforaac enara amma Gariraia bangecfunac ngicenara, yeni heitaiyunuma neneyaka ohoyem-

megec. <sup>22</sup> Ohoyemmema tacmagec Herodiaac naroangngo hama kicnginau yegec fedeec. Fedeu Herode nga ngic yegoc yaka negec, yeneng imoc hemma songo negenggec. Imocac amma ngictaungo naroanggac deec, “Ge wiac monggac negemma derecgenenna imoc naric gembade.” <sup>23</sup> Dema nemuya monggac kpacfu yofi deseriec, “Ge wiac sasawa derecgenenna gengyombonggebade nga bangecna nobohaac dena mendzicma gembade.”

<sup>24</sup> Ifi deu naroang ye kemma nonggea kpesimiec, “Ni noc wiacac debade?” deu nonggeango deec, “Ge Yohane dokunadzicac oruha dena.” <sup>25</sup> Ifi deu naroang ye imohaingoc ngictau yearu kemma deec, “Yohane dokunadzicac oruha yagucngoc terau faima nennadeac anende.” <sup>26</sup> Ifi deu ngictaungo ubaebic meec. Amma ngic tacgec, yeneac kicfu yoac bic deseriecac amma ine imoc wabesonga negenu naric mi anec. <sup>27</sup> Nga ye imohaingoc wasaingic mongsueu Yohaneac hatea mehaudeac witicamau kenec. Kemma Yohaneac ubia kperecgema <sup>28</sup> hatea imoc terau faima mehama naroang miu naroangngo imoc mekemma nonggea miec. <sup>29</sup> Anu Yohaneac medacfora yeneng siduc imoc negemma kemma farenga mehama tonggogec.

<sup>30</sup> Aposoro yeni monggoc Yesuaru kpeturangge hama wiac sasawa anggec megec nga edekpou ayemmegec, imocac siduc ammigec. <sup>31</sup> Nga ngicngac homac yeneng kengha anggecac tacnegeng nga yakaneneac titing mong mi fingerec. Imocac Yesungo medacfora yofi edeyunuec, “Ngeni hagec

tembucnina kecnideac nigoc bangec kisiu kemma kecnegembisia.”<sup>32</sup> Ifi deu yeni tembucngina gombau emma bangec mong ngiha kpacfu kenggec.

<sup>33</sup> Kemmagec ngicngac homacngo ine yenemma yentegecma taong tackenec, imohacnac nedzima warac warac ihai kensikegec. <sup>34</sup> Kensikema Yesungo gombaunac mama ngicngac habutoa ifi yenemma yeneac ubahodung negenec. Nacac yeni rama garengngina kpac kecdae, ifi isoc kecgec. Ifi negemma wiac homac edekpou ayammeec. <sup>35</sup> Ayemmema kefu marai anu medacfora yeneng yearu hama degec, “Bangec yomoc ngiha kpac anu naso bic kendacde. <sup>36</sup> Imocac ge ngicngac sueyununa ama tackende, imohai kemma yaka bummenec ambisia.” <sup>37</sup> ifi degec yeng yofi deec, “Ngeneng yaka yemmegec negec.” Ifi deu merenggec, “Neni kemma 200 denarigo\* yaka bumhema yemmeni negecdeac denec me?” <sup>38</sup> Ifi degec Yesungo yofi kpesiyemmeec, “Ngenearu ic sogong dafiguc fede, ngeni kemma henggec.” Ifi deu kenghemma edegec, “Ic sogong marimong nga kondungyang yohockang metacdimbe.”

<sup>39-40</sup> Ifi degec yeng ngicngac kpindzinu matacgecdeac edeyunuec. Edeyunuu yeni mama goa 100 nga goa 50 ifi habu mema kpindzinu tackenggec. <sup>41</sup> Tacmagec Yesungo ic sogong marimong nga kondungyang yohockang imoc meec. Mema kiwa kurumennu fiu enu kenehema ic sogong tuema medacfora ngicngac gumecyunugecdeac

---

\* **6:37:** 200 denari imoc burumaka 6ac bungngina isoc ande.

yemmeec. Yemmema kondungyang ifingoc med-  
erema yemmeu medacgec. <sup>42</sup> Mema ngicngac  
sasawango negebec amma <sup>43</sup> ic sogong nga kon-  
dungyang tosea neti anggec feu kpedzucnegec ke-  
mema sakac 12 wakeec. <sup>44</sup> Ngic yaka negec, imoc  
yeneac kpetengina 5 tauseng.

<sup>45</sup> Nedacgec wisickeu Yesungo ngicngac  
faiyunuudeac namma medacfora sueyunuu yeni  
waraima gombau emma Besaida taonnu kenggec.  
<sup>46</sup> Kemmagec ye ngicngac faiyunuma numuudeac  
tikiu enec. <sup>47</sup> Nga ama toforeyemmeu gombango  
dzohong dzongiau kemmanu Yesungo tembuha  
yeigeng kefec. <sup>48</sup> Kefu medacfora kemmagec ama  
werec wereckenggac firangngo kenggecfusing  
haecac puri kpebibiegec. Ifi anggec Yesungo  
yenemma yenearugeng dzohong witiau titi  
kemma feracyunubeso anec.

<sup>49</sup> Ye dzohong witiau titi kenecac yeni hemma  
ine wosongango hade, ifi negemma kengec amma  
arohogec <sup>50</sup> yeng yofi bic edeyunuec, “Ngeni  
wosongina makiu, imoc ni, ngeni mi kengecn-  
gunuu.” <sup>51</sup> ifi dema gombau emma yenigoc taru  
firang kpac anec. Nga yeni ongangina worau  
kerectegec anggec. <sup>52</sup> Amma yeni herengina  
dzege dzegea feecac amma yakau faka fingerec,  
imoc mi negentegecgec.

<sup>53</sup> Anu yeni dzohong ferecgema Genesarete  
bangecfu kensikema gombangina dzegegec  
tarec. <sup>54</sup> Taru gombaunac mamagec ngicngac  
yeneng Yesu bic hensigec. <sup>55</sup> Hensima amea amea  
nedzikemma ngicngac hafeigoc tofou faiyunuma,  
“Ye ihai me ihai kecde.” imoc negemma ihai

meyunu hakecgec. <sup>56</sup> Yesungo taonnu nga amabisicfu endaru ngicngac yeneng ngicngac hafeigoc meyunuma didiu faiyunugec ngakpia susiaac witiha kpeseregecdeac derecgegec. Amma kpeseregec, yeni sasawango ngeregec.

## 7

<sup>1</sup> Farisaio nga Yerusarennac mitiac negen negengngic goa yeneng Yesuaru hama kpeturanggema kecgec, <sup>2</sup> imohai Yesuac medacfora goa yeni maringina mi dzuac dzuac yaka menec anggec yenenggec. <sup>3</sup> Imoc yofiac, farisaio nga yudangic sasawango bangecfocnginaac singyoac modacma maringina dzuacmaguc yaka neandae.\*

<sup>4</sup> Amma yeni emenecfunac hama doku nadzic nadziha kpac yaka eng mi menec amma faka goa ifia momoc kpabanggema angandae. Yeni kpakenec nga sokoc amma birikeng ifingoc dzuacmaguc neandae. <sup>5</sup> Ifi anu farisaio nga mitiac negen negengngic yeneng Yesu kpesimigec, “Medacfocga yeni nocac bangecfocnina nga esangabofocnina yeneac singyoac mi modacma maringina mi dzuac dzuac yaka eng menec angandae?” <sup>6</sup> ifi degec yeng yofi edeyunuec, “Profete Yesaiango ngic ikoha ngeneacnoc kpefing fora yombong yofi ohoec, ‘Ngichabu yomoc yeni enacbibicngo sesehenuandae nga herenginango ine neac hereau kecdae. <sup>7</sup> Yeni ngicngac wiac kpouyem-meandae, imoc ngicac singyoac edekpou

---

\* **7:3:** Ge imocac hania “Yoac goaac dedekperagi” imohai hennade. Hafac 1130



ayemmeandae amma ni eng dengerenugec  
hembra fora kpac angkecde.’ *(Yesaia 29:13)*

<sup>8</sup> Ngeni Anutuac dedeseriyoac meickema ngic yeneac singyoac hoanggeandae.”

<sup>9</sup> Amma monggoc yofi edeyunuec, “Ngeni ngenang singyoac hoanggeandaeac Anutuac dedeseriyoac meickeyombonggegede.

<sup>10</sup> Mosengo yoac mong yofi deec,

‘Ge nonggo manghocga seseheyurubesena.’ nga  
‘Ngic mong ye nonggea me mamaac sowe-  
cyoac deude, ye homebeso.’ ” *(Makekeng  
20:12; 21:17; Sesememe 20:9; Dedeseri 5:16)*

<sup>11</sup> Ngeneng ine yofi deandae, “Ngic monggo nonggea me mama yofi edema deude, ‘Wiac gamba nanggegudeac dedua, imoc bic Anutuac sese† dedua.’ <sup>12</sup> Ifi deu ngeni ngic nonggea me mama meficgeudeac dekpitari ammigecde.

<sup>13</sup> Amma ngeni singyoacngina kpabanggema Anutuac yoac semema faka goa ifia homac angandae.”

<sup>14</sup> Yesungo ifi dema ngichabu monggoc kpacyunuu hagec yofi edeyunuec, “Ngeni kedzac kpema negentegecdagec. <sup>15</sup> Wiac monggo ngadeaunac kemeande, imocngo ngic ubahere naric mi heidzadzu kpeude, kpac. Nga ngic here-manauac wiac ereande, imocngo ine ngic heidzadzu kpeude. <sup>16</sup> Ngic kedzahagoc kecde, yeng yoac yomoc negembeso.”

<sup>17</sup> Ye ifi dema ngicngac wayunuma amau enu medacfora yeneng yoac heima deec, imocac kpesimigec yofi edeyunuec, <sup>18</sup> “Ngeni negen negen-

---

† 7:11: Sese imoc Hebraio yoacfusing Korban

tegecngina kpac, ifi isoc kecdaengoc. Ngadeaunac wiac mong heremanau kemeande, imocngo naric mi heidzadzu kpeude, ngeni imoc mi negentegecdae me? <sup>19</sup> Wiac imocngo ubanginau mi kemeandeac hereu kemema isinggeu keractennu kemeude.” Yesungo ifi dema yaka sasawa nenideac desorongaiec. <sup>20</sup> Amma torokpema yofi deec, “Wiac mong ngic ubahereunac ereande, imocngo ine heidzadzu kpeude.

<sup>21-22</sup> Nga ngic ubahereunac wiac yofia ereande, negen negeng mangana nga Kaiserofaka amma hamangecfaka nga ngickpekpe amma eweeneng mewa nga kic hodung amma manganaac areng meme nga ikoc faka amma faka sicsauha nga keracmangang amma desureyoac nga sebiengeng amma ubafong, <sup>23</sup> imoc sasawango ubahereunac erema ngic heidzadzu kpeude.”

<sup>24</sup> Anu Yesungo yacma imohacnac kenec. Kemma Tiro nga Sidong amabangecfu kensikema ama monnu enec. Enu ngicngac yeni taong imohai siduha mi negenggecdeac, ifi negenec amma ye ine sufuma tarudeac obohoec. <sup>25-26</sup> Ammanu imohaingoc Sirofoinikia bangecfunac grikgac mongngo haec. Hama Yesuac haniu makpema naroanga asu seuhagoc kporacmiudeac derecgemiec. <sup>27</sup> Derecgemiu Yesungo yofi edeac, “Nambarac yeni yaka warac warac nema gebecyunubeso. Nambarac yeneac yaka wangecyunuma kasi yenearu ukunide, imocngo faka gombunga kpac.”

<sup>28</sup> Ifi deu ngacngo meremmiec, “Kebu, imoc negenduae, amma kasi yeni sifu nambarac yeneng

yaka kisickegec tebo bageau maande, imocsac neandae.” <sup>29</sup> ifi deu Yesungo yofi edeac, “Ge yocac ifi denecac kenna, hadehade ye naroangga bic wadac.” <sup>30</sup> Ifi deu ngac ye ameau kemma henu hadehadengo naroanga bic wau naroang ye fe-feau waickema feec.

<sup>31</sup> Yesungo Tiro bangecfunac dzigenema Sidong taong ferecgema Dekaporisi‡ bangecfu sing kemma Gariraia dzohonnu kensikeec.

<sup>32</sup> Kensikemanu ngicngac yeneng ngic mong kedzacfong nga yocac dedeac enara ebiria, ye mehama Yesu mariango kpesereudeac desambic ammigec. <sup>33</sup> Ifi degec negemma ye ngichabu yeneacunac meickema ngic ngadeau faiu nanu gbongango kedzahau faima mariau sofohoma nedzaranga kpesereec. <sup>34</sup> Kpeserema kurumennu fiu enu asu heima deec, “Eƒfata!” Imocac titiha yofi, “Ge sarina!” <sup>35</sup> Ifi deu ngic kedzaha bic sariu nedzaranga monggoc merenu yocac tongganang deec.

<sup>36</sup> Ifi deu Yesungo faka fingerecmoc, imoc ngicngac yeneng mi deyadigecdeac seria yombong deracyunuu yeni ine imoc monggoc deyadiyombonggema degec. <sup>37</sup> Ifi degec ngicngac yeni homac wareckema kerectegec amma degec, “Ye wiac sasawa mema kecde, imoc ngereeyombonggedacde. Ye ngicngac kedzacfong yeneac kedzac mesariude nga yoacngina kpac, yeni yoac meficgemyemde.”

## 8

1 Naso imohai ngicngac habutoa yeni mong-

‡ 7:31: Dekaporisi imoc titiha taong 10.

goc Yesuaru hama kpeturanggegec. Nga yakangina kpac anu Yesungo medacfora kpacyunuma yofi edeyunuec, <sup>2</sup> “Ngicngac yomoc yeni yakangina kpac uameme harebec bic nigoc kecdauac ubana manganede. <sup>3</sup> Goa yeni amabangec hereaunac hagecac yakaya kpacfu sueyunuba amanginau kengkecma kicgigi ayemmebacac.” <sup>4</sup> Ifi deu medacfora yeneng degec, “Nenang bangec kisi yofiau yaka dafiu meficgema habutoa yemmeni gebecyunuude?” <sup>5</sup> ifi degec Yesungo kpesiyemmeec, “Ngeni ic sogong dafiguc mekecdae?” deu yeni “Seweng” degec.

<sup>6</sup> Ifi degec negemma Yesungo habu bangecfu matagecdeac edeyunuec. Edeyunuma ic sogong seweng mema Anutuac ubangerec dema tuema medacfora yemmeu yeneng mederema ngicngac arennu yemmegec. <sup>7</sup> Amma ye kondungyangbisic bisic goa metagecmoc, imoc ifingoc Anutu ubangerec edema faiyemmegecdeac edeyunuec. <sup>8</sup> Faiyemmegec yeni negec gebecyunuu yaka tosea tarec, imoc mema kpedzucnegec sakac <sup>7</sup> anec. <sup>9</sup> Nga ngic 4 tauseng ihai tacgec, yeni negec wisickeu sueyunuu kengha anggec. <sup>10</sup> Nga Yesu ye imohaingoc medacforagoc gombau emma Darimanuta bangecfu kenggec.

<sup>11</sup> Farisaio yeneng hama Yesugoc yoacngina engemmama anec. Yeni kuha isinggegecdeac faka kuhagoc mong kurumennunac meu henggecdeac derecgemigec. <sup>12</sup> Ifi degec yeng ongaasuyau ebic meficgema yofi deec, “Naso yomocac ngicngac ngeni nocac faka kuhagoc henggecdeac derecgeandae? Foracngoc, ngicngacareng yomoc nge-

nearu faka kuhagoc mong naric mi fingecngem-meude, imoc edengunuduae.” <sup>13</sup> Ifi dema ngic imoc wayunuma gombau monggoc emma dzohong nobocgeng kenggec.

<sup>14</sup> Naso imohai medac yeni ic sogong nigecyunuu mocgusac gombau taru mekenggec. <sup>15</sup> Nga Yesungo gorongina kpema yofi edeyunuec, “Ngeni farisaio nga Herode yeneac yis, imocac henghomema kecbisia.” <sup>16</sup> ifi deu yenaocngoc denegeng amma degec, “Nenang ic sogonnina kpac, imocac amma ifi dede.” <sup>17</sup> Ifi denegeng anggec ye imoc negemma edeyunuec, “Ngeni ic sogong mi mehadauac denegeng andae nga ngeni yoac imoc wagec. Ngeni herenegen negengngina dzege dzegeaac amma wiac mong mi negentegedae. <sup>18</sup> Ngeni kicnginagocngo wiac mi hengandae nga kedzacnginagoc ammanu wiac mi negengandae.

<sup>19</sup> Ni ic sogong 5 tuema ngic 5 tauseng gumecyunuba tosea taru sakac dafiguc kpedzucnegec wakeec, imoc bic nigecngunuec me?” Kpesiyemmeu yeni 12 degec. <sup>20</sup> “Anu monggoc ic sogong 7 tuema ngic 4 tauseng gumecyunuba tosea taru sakac dafiguc kpedzucnegec wakeec?” kpesiu yeni 7 degec. <sup>21</sup> Ifi degec yeng yofi edeyunuec, “Ngeni yaguc ifingoc negen negengngina mi ireckedengoc.”

<sup>22</sup> Anu yeni Betsaida amabangecfu kensikemagec ngicngac yeneng ngic kicpisc mong Yesuaru mehama mariango kpesereudeac desambic ammigec. <sup>23</sup> Ifi anggec ye kicpisc mariaui mema guruama ngadeau hesicke

kemma kiwau sofohoma mariango witiau faima kpesimiec, “Ge wiac mong hennec me?”

<sup>24</sup> Kpesimiu kicpiscic yeng kic fima deec, “Ngic yeni siricngina ic isoc yenemba kengha andae.”

<sup>25</sup> Ifi deu Yesungo kiwau maria monggoc faiu ngereema wiac sasawa gombunga nga dindingac henec. <sup>26</sup> Henu suema yofi edeec, “Ge amagau kemma taonnusing mi embesena.”

<sup>27</sup> Amma Yesungo medacfora yenigoc Kaisarea Firipo taonnu kenggec. Sinnu kemmagec yeng medacfora yofi kpesiyemmeec, “Ngicngac yeni neac merac deandae?” <sup>28</sup> Ifi deu degec, “Ngic goango Yohane dokunadzic deandae nga goango Eria amma goa yeneng ine profete mong esea deandae.” <sup>29</sup> Ifi degec yofi kpesiyemmeec, “Anu ngeni ngenaoc ine neac merac deandae?” deu Petorongo deec, “Ge Messia.” <sup>30</sup> Ifi deu yeng yoac imoc ngic mong mi edeyunugecdeac dera-cyunuec.

<sup>31</sup> Anu Yesungo yofi edekpou ayemmeec, “Ngicac Medac ye kpendzeng homac kpebeso. Yudangic enarafocngina nga womong gareng enara amma mitiac negen negengngic yeneng ye ubango wama kpegec homebeso. Homeu uameme harebec ammanu monggoc gborima yacbeso.” <sup>32</sup> Yoac imocac didiu yombong edeyunuu Petorongo ngadeau wangec kemma tembucfu namma kpetarimiyombonggeec.

<sup>33</sup> Kpetarimiu Yesungo dzigenema kiwa medac yenearu fima Petoro kpetarimima edeec, “Satang, ge ngadenau hakenna. Ge wiac negennec, imoc Anutuarunac kpac, imocngo ine ngicac negen negeng ande.”

<sup>34</sup> Yesungo habu nga medacfora kpacyunuma yofi edeyunuec, “Ngic mong ye ni modacnubeso negendeu ye yengena ubasebiaac songo memama mariponga miacma tofohoma modacnubeso. <sup>35</sup> Imoc yofiac, ngic mong ye kekeha segereudeac negemma uaya mede, ye kekeha sufumiude. Nga ngic mong ye neac amma nga siduc gombunggac amma kekeha waude, ye ine kekeha fingecmiude. <sup>36</sup> Imocac ngic mongngo bangectoa bangec yomocac wiac sasawa meficgeecac kekeha ukuu sufuude, imocngo ngic naric mi meficgeude. <sup>37</sup> Ngickekec monggoc memeaac sing mong mi fede. <sup>38</sup> Imoc yofiac, ngic mongngo neac negenu gameagoc anude amma neac yoacnaac negenu gameagoc ande, yearu yofi fingerude, Ngicac Medacngo Mamaac kuc nga kibikperagiau angero kpetiac yenigoc haude, yeng ngic imoc yeac ifingoc negenu gameagoc anude.”

## 9

<sup>1</sup> Yesungo torokpema yofi edeyunuec, “Foracngoc, ngic yomoc nandae, ngenearunac goa mi homemagec Anutuac eucerereng kuhagoc fingectegeru henggecde, imoc edengunuduae.”

<sup>2</sup> Anu uameme 6 wisickemanu Yesungo Petoro nga Yakobo amma Yohane meyunuu tikitoa herea monnu tembucngina kecgecdeac enggec. Emma sebia kicnginau heimeremma siraha mong yombong anec. <sup>3</sup> Ngakpia hereha kperagima kongac koporarac yombong anec. Bangecfu ngic mongngo wamba kongac kongac ifia naric mi meficgeude. <sup>4</sup> Anu imohaingoc Mose nga Eria fingecyemmema Yesugoc yoac denegeng anoc.

<sup>5</sup> Ifi anggec Petorongo Yesu edeec, “Kpoukpou, yei kecni songea andeac bedzo bedzo harebec meni. Geac mong nga Moseac mong amma Eriaac mong.” <sup>6</sup> Yeni homac kengecyunuecac ye noc wiac debeso, imoc obohoec. <sup>7</sup> Ifi nammagec hoeng mongngo hama semeyunumanu hoeng manaunac yoacudumeng mong yofi fingerec, “Yomoc neac Songomedacna, ngeni yeac yoac negembisia!” <sup>8</sup> Yoac wisickeu imohaingoc yeni fikengfiha amma Yesungosac yenigoc nanu henggec nga ngic mong mi henggec.

<sup>9</sup> Nga yeni tikiunac mamagec Yesungo dera-cyunuma yofi deec, “Ngeni wiac hendaumoc, imocac siduc ngic mi edeyunubisia. Kecma Ngicac Medac homecfunac gborima yaruguc ine debisia.” <sup>10</sup> Edeyunuu medac yenaocngoc kpesimegec, “Homecfunac gborima yacyac, imocac hania dafi?”

<sup>11</sup> Yeni yofi dema kpesimigec, “Mitiac negen negengngic yeni dafiac Eriango waraima haudeac deandae?” <sup>12</sup> Ifi degec yofi edeyunuec, “Eriangonoc hama wiac sasawa memengere anude. Nga mitikibiu yofi oho ohoya fede, ‘Ngicac Medac ye kpendzeng homac kpeu desure ammigeede.’ imoc dafiac negensidae?” <sup>13</sup> Amma yofi edengunuba, “Eria ye bic haec nga ngic yeni songonginaac arennu faka hania hania ammigec, imoc yeacnoc oho ohoya fede.”

<sup>14</sup> Yeni tikiunac mama medacfora goa yeneng yenearu hama henggec ngicngac homac yeneac botucfu mitiac negen negengngic yenigoc yoacngina engemmama anec. <sup>15</sup> Nga ngicngac nanggec, yeneng Yesu hemma kpidohoma bic



nedzikiemma wenacngerec demigec. <sup>16</sup> Ifi anggec Yesungo kpesiyemmeec, “Ngeni nocac yoacngina engemmama ande?” <sup>17</sup> Ifi deu habu yenearunac ngic mongngo deec, “Kpoukpou, hadehade mong yoara kpacngo medacnaac enac mema medzickeu gearu mehaduae.

<sup>18</sup> Nga hadehadengo naso homac ye mema kpekpefac ammiande. Ammiu ye hanimaria goru enaraunac nambang sofororoc ereu enara kirandziande. Imocac medacfocga yeneng asu mangana kporacmigeceac deba yeni kporachibiema wadau.” <sup>19</sup> Ifi deu Yesungo yofi merenec, “Areng yomoc ngeni negen negensingngina kpac yombong. Ni ngenigoc naso herea monggoc tacbadeac modzona tide. Ngeni medac imoc megec hau.” <sup>20</sup> Ifi deu mekenggec hadehadengo Yesu hemma medac kpefahau bangecfu makpeec. Makpeu enaraunac nambang nga sofororoc ereec.

<sup>21</sup> Ereu Yesungo mama kpesimiec, “Hafei yomoc noc nasoac hanahema finge cmiec?” deu mamango deec, “Imoc sabahaungoc finge cmiec.” <sup>22</sup> Finge cmiu hadehadengo naso homacngoc medac kpehomeudeac gerecfu me dokuu kpefahau kemeande. Nga ge meficnurunadeacsoc andeu sifu ubaga manganeu meficnuruna.” <sup>23</sup> Ifi deu Yesungo yofi edeec, “Imoc ambadeacsoc, denec. Ngic mong ye negensinggede, yearu wiac sasawa naric fingerude.” <sup>24</sup> Ifi deu imohaingoc medac mamango arohoma deec, “Ni negensingguba negen negensinna wegenedeac geng meficnuna.”

<sup>25</sup> Ifi deu ngicngac homacngo Yesuaru nedzima kenggec yeng yenemma asu seuhagoc yoac seria ammima yofi edeec, “Asu kedzacfong amma yoacga kpac, ni edeguduae, ge medac imoc wama erema kemma monggoc dzigenema yearu mi kembesena.” <sup>26</sup> Ifi deu hadehadengo kucgoc yombong arohoma tima erema kenu medac ye homemea isoc feec. Feu ngic yeneng imoc hemma bic homedac degec. <sup>27</sup> Ifi degec Yesungo ine mariau mema miaru yarec.

<sup>28</sup> Yaru Yesungo amau enu medacfora yeneng tembucfu yegoc tacma kpesimigec, “Neni dafiac hadehade imoc kporacnideac obohoding?” <sup>29</sup> Ifi degec yeng yofi edeyunuec, “Hadehade ifia yakasege kecma nunumungo kporachesonga.”

<sup>30</sup> Yesu nga medacfora yeni ama imoc wama yofi negemma Gariraia bangec ferecgema kenggec, “Ngicngac yeneng imoc mi negembisia.” <sup>31</sup> Nga ye imohai kemma medacfora yofi edekpou ayem-meec, “Ngicngac yeni Ngicac Medac kererema ngic yeneac mariu faigecde. Faigec yeneng ye kpegec homeude. Homeu uameme harebec amanu gborima monggoc yarude.” <sup>32</sup> Ifi deu yeni ine imoc mi negentegecma kpesigecdeac kengecyunuec.

<sup>33</sup> Anu Yesungo Kafanaung taonnu kensikema amau emma medacfora yofi kpesiyemmeec, “Ngeni sinnu noc wiacac denegeng andau?” <sup>34</sup> Kpesiyemmeu waickema tacgec nocac yeni sinnu yenanggarunac merang engena kecde, imocac denegeng anggec. <sup>35</sup> Tacgec Yesungo medacfora 12 kpacyunuma yofi edeyunuec,

“Ngic mong ye enara kecbeso negende, yeng ngic tosofora sasawa, ngeneac ngadeu kecma ngeneac kingangkpekpe ambeso.” <sup>36</sup> Ifi dema nambarac yeneacunac mong mema botucnginau faima hoanggema yofi edeyunuec, <sup>37</sup> “Ngic mong ye nambarac yeneacunac mong yofia neac kpacfu hoanggeude, ye ni hoannuude. Nga ngic mong ni hoannude, yeng nisac mi hoannuude, kpac. Yeng Anutu suenuec, ye ifingoc hoanggeude.”

<sup>38</sup> Anu Yohanengo Yesu yofi edeec, “Kpoukpou, ngic mong ye geac kpacfu hadehade nga yafing kporacyemmeu hending. Amma ye nenanggoc mi kecdeac kpetarimiding.” <sup>39</sup> Ifi deu Yesungo yofi deec, “Ngeni mi kpetarimibisia. Ngic mong ye neac kpacfu ua mong kuhagoc meude, yeng kpacna bic mi demanganeude. <sup>40</sup> Ngic mong ye neneac ngaba mi ande, yeng ogonina anude. <sup>41</sup> Nga ngic mong ye ngeni Kristoac medac dema doku kpakencfcu kpengemmeu negecde, foracngoc, yeng wiac imocac buma mi obohoude, imoc edengunuduae.”

<sup>42</sup> “Amma nambarac kapia mongngo ni negensinnukecde, ngic mongngo nambarac ifia faka mangana kpoumibacac amma ye yagucnoc dzamandzingtona ubeau ubahemima kondungtoau ukugec kemeu, imocngo ngic yearu ngereebac. <sup>43</sup> Nga mariga mongngo anggenu kopocsic meficgenadeu ge imoc herecgema ukubesena. Mariga yohockanggoc kecma hofeac gerec pisic pisickea kpac, imohai kemebanggac maritegec kecma kekecseriu enna ngereeude.

<sup>44</sup> ‘Hofeu kamangina mi homeude nga gerecngo

mi pistickeude.’ *(Yesaia 66:24)*

<sup>45</sup> Amma haniga mongngo anggenu kopocsic meficgenadeu imoc herecge ukubesena. Haniga yohockanggoc kecma hofeu kemebanggac hanitegec kecma kekecseriu enna ngereeude.

<sup>46</sup> ‘Hofeu kamangina mi homeude nga gerecngo mi pistickeude.’

<sup>47</sup> Me kicga mongngo anggenu kopocsic meficgenadeu imoc mesiukubesena. Kicga yohockanggoc kecma hofeu kemebanggac kicga mocgusanggoc kecma Anutuac eucerereng manau enna ngereeude.

<sup>48</sup> ‘Hofeu kamangina mi homeude nga gerecngo mi pistickeude.’

<sup>49</sup> Ngicngac kondung hosoandae, ifi isoc ngicngac sasawa gerecngo hosoyunubesonga. <sup>50</sup> Kondung imoc wiac gombunga nga imocngo ine kiacma songea kpac anudeu geng songea monggoc naric mi meficgenade. Ngeni kondung songea uba-herenginai mekecma ruaefaka angemmebisia.”

## 10

<sup>1</sup> Yesungo bangec imoc wama Yudaia bangecfu Yodang nobocgengau kenec. Kensikeu ngicngac habutoango yearu monggoc kemma kpeturanggegec. Kpeturanggegec ye fakaya modacma edekpou ayemmeec. <sup>2</sup> Nga farisaio goa yeni ye tobanggegecdeac negemma kpesimigec, “Ngi mong ye enema naric waude, imoc singngo dede me kpac?” <sup>3</sup> ifi degec yofi merengyemmeec, “Mosengo imocac dedeseriyoac dafi ngemmeec?” <sup>4</sup> ifi deu yeneng degec,

“Mosengo yofi naric annideac deec, ‘Mong ye ngac wabeso dema yeng wawakibi mima wau kembeso.’ ” *(Dedeseri 24:1-4)*

<sup>5</sup> Ifi degec Yesungo yofi edeyunuec, “Ngeni ngic ubaseri nga herengina dzege dzegea, imocac Mosengo dedeseriyoac imoc ohongemmeec. <sup>6</sup> Nga hanac hanaheau Anutungo siricngira ngic nga ngac anecdeac, ifi meficyuruec. *(Fingec fingec 1:27; 5:2)*

<sup>7</sup> Imocac amma ngicngo nonggomama wayuruma enemaaru kpeketahou <sup>8</sup> yegoc sebi mocgu anecde. Ifi anecdeac yohockang monggoc mi andape, yeri sebi mocgu anecde. *(Fingec fingec 2:24)*

<sup>9</sup> Anutungo wiac dzegeec, imoc ngicngo naric mi herecgebeso.”

<sup>10</sup> Nga yeni amau monggoc emma medacfora yeneng imocac kpesimigec <sup>11</sup> Yesungo yofi edeyunuec, “Ngic mongngo enema wama ngac mong meude, ye serofaka enema esea ammiude. <sup>12</sup> Nga ngac mongngo ewea wama ngic mong meude, ye serofaka ammiude.”

<sup>13</sup> Ngicngac goa yeni Yesungo nambaracfocongina mariango kpesereyunuudeac meyunu hagec. Hagec medacfora yeneng ine kpetariyemmegec. <sup>14</sup> Ifi anggec Yesungo imoc hemma negenu homac manganeu yofi edeyunuec, “Nambaracbisic yeni nearu naric hagec, ngeni kpae mi heiyemmegec. Kurumenggac eucerereng imoc nambaracbisic yofia yeneac. <sup>15</sup> Foracngoc, ngic mong ye nambarac kapia yeni isoc mi anudeu ye Anutuac eucererennu naric mi enude, imoc edengunuduae.”

<sup>16</sup> Ifi dema nambarac tabucyunuma maria witinginau faima kenecyunuec.

<sup>17</sup> Yesungo kembesonga kemmanu ngic mongngo yearu nedzikemma yeac kicfu fafoc heima kpesimiec, “Kpoukpou gombunga, ni dafi amma kekecseriac maridzoming mebade?” <sup>18</sup> ifi deu Yesungo yofi edeec, “Ge nocac gombunga denennec? Anutu mocgungo gombunga kecde.

<sup>19</sup> Ge dedeseriyoac bic negennec,

‘Ge ngicngac mi yunuhomesesena, kaisero mi ambesena, hamangec mi mebesena, enacfu faifai mi ambesena, ngic yeneac wiac mong mi wangecyunubesena, nonggo manghocga seseheyurubesena.’”  
(*Makekeng 20:12-16; Dedeseri 5:16-20*)

<sup>20</sup> Ifi deu yeng meremma edeec, “Kpoukpou, ge denec, imoc sasawa sebigborinaungoc angereai.” <sup>21</sup> Ifi deu Yesungo yearu kic fima yeac songo negemma yofi edeec, “Ge wiac mocguac kpedadangenec. Ge kemma finacga sasawa fegende, imoc suena dzo kirecgeu imoc ngicngac makpekpea yemmebesena. Ifi anna kurumeng-gac dzofinac fingecgenu hama modacnubesena!”

<sup>22</sup> Ifi deu ngic ye ubea manganeu negengebirima kenec nocac ye dzofinaha homac femiec.

<sup>23</sup> Kenu Yesungo fikengfiha amma medacfora yofi edeyunuec, “Ngic dzofinactoanginagoc yeneng Anutuac eucerereng manau enggecdeac ambibieyombonggegecde.” <sup>24</sup> Ifi deu medac yeneng yoac imoc negemma kerecgec anggec monggoc yofi edeyunuec, “Nambaracfocna negenggec, ngic finactoyagocngo Anutuac

eucerereng manau engeng, imoc uatoayagoc. <sup>25</sup> Kamerengo bungic singau engeng, imoc ua efea nga dzofinactoagoc yeng Anutuac eucererennu engeng, imocngo ine uatoayagoc.” <sup>26</sup> Ifi deu yeni kerectegec yombong amma degec, “Ifi anu merang naric komoc kpeude?”

<sup>27</sup> Ifi degec Yesungo kiwa yenearu fima yofi deec, “Ngicngac yeni imoc ambibiema wagecde nga Anutungo wiac sasawa naric mema wiac monggac mi obohoude.” <sup>28</sup> Ifi deu Petorongo deec, “Negenec, neni wiacnina sasawa wadacma ge modacguma kecdimbe.”

<sup>29</sup> Ifi deu Yesungo yofi deec, “Ni fora yombong edengunuba, ngic mong ye amabangeha me daramunea me nonggomama me nambaracfora me amauaya, imoc neac nga siduc gombung-gac amma waude, <sup>30</sup> yeng turunga mi obohoude. Amma ye wiac wadac, imocac turunga naso 100 monggoc meude. Ngicngac yeni naso yomohai ama nga daramuna amma nonggonasia nga nambaracfora amma amaua migece, imoc sisic ammimagec mekefude. Nga ngade bangec siriha mong haude, imohai Kebungo kekecseri ifingoc miude. <sup>31</sup> Anu ngic warac warac kecdae, yenearunac homacngo ngadea anggecde nga ngadea kecdae, yenearunac homacngo warac warac anggecde.”

<sup>32</sup> Anu yeni sing modacma Yerusarennu kengkecmagec Yesungo waraiu medacfora yeni ye modacma negenggec wiac kuneng anec nga goa ye modacgec, yeneng kengec anggec. Nga Yesungo medacfora 12 ngadeau meyunuma

wiac fingecmiude, imocac yoac edeyunuec. <sup>33</sup> “Negenggec, nenang Yerusarennu endimbe. Enni ngic yeneng Ngicac Medac womong gareng enara nga mitiac negen negengngic yeneac mariu faigec, yeneng ye homeudeac desigecde. Desima ye bangec monnunac ngic Anutu mi negemmidae, yeneac mariu faigecde. <sup>34</sup> Faigec, yeneng faifagoc ammima sofohoma dzikacngo kpema kpehomegecde. Nga uameme harebec ammanu ye monggoc gborima yarude.”

<sup>35</sup> Anu Dzebedaioc medahora, Yakobo nga Yohane, yereng Yesuaru kemma deoc, “Kpoukpou, neri wiac monggac derecgede anecmenadeac negendipe?” <sup>36</sup> Ifi deec kpesiyemerec, “Ni noc wiac angecmebadeac negendape?” <sup>37</sup> Kpesiyemeru deoc, “Kecma kibikperagigau nerearunac mongngo foigau nga mongngo kanagau tacede, imoc deserinemecna.”

<sup>38</sup> Ifi deec Yesungo yofi edeyuruec, “Ngeri wiac kpesidape, imocac hania mi negenghomedape. Neng kpendzenggac kpakenecfu nebade, ngeri imoc ifingoc neecdeac dedape nga doku nadzicbade, ngeri imohai nadzirecde me?” <sup>39</sup> Ifi deu yereng deoc, “Oc, naric andede.” ifi deec Yesungo yofi edeyuruec, “Ni kpakenecfu nebade, imoc ngeri ifingoc neecde nga doku nadzicbade, imoc ngeri ifingoc nadzirecde. <sup>40</sup> Nga merang foinau me kananau tarude, imocac fora ine neng naric mi desibade. Tatac imoc ngic damoc yeneac mengec mengerea fede, yeneng ihai tacgecde.”

<sup>41</sup> Anu medacfora 10 yeneng imoc negemma Yohane nga Yakobo yereac negenggec manga-



nec. <sup>42</sup> Manganau Yesungo kpacyunuu kenggec yofi edeyunuec, “Bangec monnunac ngicngac enarafocngina deyecdeyemnea, yeni ngicngac yeneac ngickuneng siricfu yenigoc kecandaec kuc feyemmede. Nga kunengfocngina yeni kuc feyemneu ngicngacfocngina yeneng yoacngina modacgecde, ngeni imocnoc negendae. <sup>43</sup> Nga ngenearu faka ifia ine mi fingecebeso, kpac. Ngenearunac ngic mongngo engena kecebeso amide, yeng ine botucnginau kingang kpekpengina kecebeso. <sup>44</sup> Amma ngenec botucfunac mongngo warac warac ambeso amide, yeng tosofora sasawa, yeneac wanacngic kecebeso. <sup>45</sup> Imoc yofiac, ngicngac yeneng Ngicac Medac kingang kpemigececeac mi maec, kpac. Yeng ine yeneac kingang kpema ngicngac homac yungecyunuma kekeha wau yeneac doudeac maec.”

<sup>46</sup> Yesu nga medacfora yeni Yeriko taonnu kensikegec. Ihai keema ngicngac habutoa yenhafoc Yeriko monggoc wagec. Wamagec ngic kicpisc mong kpara Batimaio, imocac titiha Timaioac medac, yeng sing tegiau tacma iwaiac derecekefec. <sup>47</sup> Derecekefufu Yesu Nadzarete taonnunac, yeng hama kende, yeni yoac ifi degec ye imoc negemma kucgoc kpacma deec, “Yesu, Dawidiac bangec, ge neacnec ubaga manganau.” <sup>48</sup> Ye serima ifi kparu ngicngac homacngo waicke tarudeac edegec. Edegec yeng ine seria monggoc kparec, “Dawidiac bangec, ge neacnec ubaga manganau.”

<sup>49</sup> Kparu Yesungo namma yofi deec, “Ngeni kpacgec ye nearu hau.” deu ngic yeneng ngic

kicpiscac kpacma degec, “Ye kpacgude, ge ubaga ngereeu yacma kenna.” <sup>50</sup> Ifi degec ngic ye ngakpi-heraha ukuma futucke yacma Yesuaru kenec. <sup>51</sup> Kenu Yesungo kpesimiec, “Ni noc wiac anggembadeac negennec?” deu ngic kickundungno deec, “Kpoukpou, kicfifi ambadeac negenduae.” <sup>52</sup> Ifi deu Yesungo yofi edeec, “Negen negensinggango mengeregudac imocac naric kenna!” Ifi deu ye imohaingoc kicfifi amma Yesu sinnu modacma kenec.

## 11

<sup>1</sup> Anu yeni kengkecma Yerusareng taong mewe-genebeso amma Oriwa tikiu Betefage nga Betani amabangec tarocfu kensikegec. Kensikemagec Yesungo medacfora yenearunac ngic yohockang sueyuruma yofi deec, <sup>2</sup> “Ngeri dindingac kemma guruama sing enarau tacde, imohai emma donggi medaha mong ngicngo witiau mi tatara, imoc witickegec nande, ngeri imoc meficgema witic yungecma mema haec. <sup>3</sup> Yungerec ngic mongngo kpesingemecma deude, ‘Ngeri dafi anecdeac andape?’ ifi deu yofi edebesera, ‘Kebungo imocgoc ua meudeac dede.’ ifi deec minginango donggi bic faiu haude.”

<sup>4</sup> Ifi deu yeri kemma donggi medaha sinnu ama naguyau witic witickea nanec, imoc hemma yungeroc. <sup>5</sup> Yungerec ngic goa ihai nanggec, yeneng yeremma degec, “Ngeri dafi negemma donggi medaha yungecdape?” <sup>6</sup> Ifi degec yeri Yesungo yoc edeyuruec, imoc edeyunuec yeni negemma wayuruec kenoc. <sup>7</sup> Kemma donggi Yesuaru mekemma ngakpingira herea

hesima donggi medaha witiau tiameec Yesungo imocac witiau tarec. <sup>8</sup> Taru ngicngac homacngo ngakpingina herea hesima sinnu tiamegec goango ua tegiaunac ic fawa herecgema sinnu faikenggec.

<sup>9</sup> Nga ngicngac kiwau kenggec nga ngadeau modacgec, yeneng kpacma yofi degec,

“Ohec, ngic Kebuac kpacfu hade, ye kenehagoc, hosanna. *(Mitiyegec 118:26)*”

<sup>10</sup> Mannina Dawidiac eucerereng hade, imoc kenehagoc. Wi kurumennu kpara dengeregec, ohec waec, hosanna.”

<sup>11</sup> Yesungo ifi Yerusarennu emma Anutuac womonnu enec. Emma hennegeng andacma ama marai anecac medacfora <sup>12</sup> meyunuu Betania amau kenggec.

<sup>12</sup> Werekengau yeni Betania wama mama Yesungo hereaac homeec. <sup>13</sup> Homema hereau fima fig ic mong maria tengging tengging henec. Hemma negenu foragoc isoc anu ic haniau kensikema maria meficgeec. Fig nasoya mi anecac ifi anec. <sup>14</sup> Nga ye fora hofocma ic yofi edeec, “Gearunac ngic mongngo fora monggoc mi nebeso.” ifi deu medacfora yeneng yoac imoc negenggec.

<sup>15</sup> Yesungo Yerusarennu kensikema Anutuac womonggac oda manau enec. Emma ngic wiac emekpesi anggec, yeni imohacnac kporacyunuec. Ye ngic hiedzo emekpesi anggec, yeneac tebo heimerenec nga kebesac emegec, yeneac tatac heimeremma <sup>16</sup> Anutuac womong manau wiac ifia meenggecdeac kpetariyemmec.

17 Kpetariyemmema yofi edekpou ayemmeec,  
 “Yoac yofi oho ohoya fede,

‘Amana imoc bangeha bangeha ngicngac  
 sasawa yeneac nunumuama, kpara ifi  
 kpachbesonga.’ *(Yesaia 56:7)*

Nga ngeneng merenggec imoc ine hamangecngic  
 yeneac sufu sufuama ande.” *(Yeremaia  
 7:11)*

18 Ifi deu womong gareng enara nga mitiac  
 negen negengngic yeneng imoc negemma ye  
 kpegecdeac sing hofocgec. Nga habu sasawango  
 yeac kpoukpouyaac negenggec engena anec  
 nga yeni ine yeac kengecyunuec. <sup>19</sup> Nga ama  
 marai anu Yesu nga medacfora yeni taong wama  
 kenggec.

<sup>20</sup> Wereckengau yeni sinnu kemma henggec fig  
 ic imoc godeaunacngoc sokuema nanec. <sup>21</sup> Nanu  
 Petorongo imoc hemma negensima Yesu edeec,  
 “Kpoukpou ge henna, ge fig ic soweckedang,  
 imoc bic ururuema nande.” <sup>22</sup> ifi deu Yesungo  
 yofi merennec, “Ngeni Anutu negensinggebisia.  
<sup>23</sup> Foracngoc, ngic mong ye ubeau negengyohoha  
 kpac kecma wiac mong me mong dema imo-  
 cac fora fingerudeac negensiudeu yeng tiki edi-  
 moc yacma kondunnu kemeu deu imoc foranoc  
 fingerude, imoc edengunuduae. <sup>24</sup> Ni imocac  
 amma yofi edengunuduae, ngeni wiac imocac me  
 imocac negensima menide, ifi negemma negens-  
 inggema numugec wiac imoc fingecongemmeude.

<sup>25</sup> Anu ngeni namma numuandae, imohai ngic  
 monggac wiac me monggac ngaba mekecdae

kopocsiha wabisia. Ifi anggec kurumeng Mangnginango ngeneac kopocsic ifingoc waude. <sup>26</sup> Nga ngeni ngic yeneac kopocsic mi wagecdeu ine Kurumeng Mangnginango ngeneac kopocsic ifingoc mi waude.”

<sup>27</sup> Yesu medacforagoc yeni Yerusarennu dzi-gene enggec. Emma Yesungo Anutuac womong manau yerecgemanu womong gareng enara nga mitiac negen negengngic amma enarafocngina, yeneng yearu hama kpesimigec, <sup>28</sup> “Gencoc kucfu ua yomoc menec nga merang ua imoc menadeac uayoac genec?” <sup>29</sup> Ifi degec Yesungo yofi merengyemmeec, “Ni yoac mong kpesingemeba turunga edenugecguc ni ifingoc uakibinaac hania imoc edengunubade.

<sup>30</sup> Yohanengo dokunadzic ua mekefec, ua imoc kurumennunac me ngicfunac, ngeni imoc edenugec negemba.” <sup>31</sup> Ifi deu yeni yenaocngoc denegeng amma degec, “‘Imoc kurumennunac.’ ifi denideu yeng yofi kpesinemmeude, ‘Ifi negemmaguc ngeni nocac ye mi negensinggegec?’”

<sup>32</sup> Nga ngicfunac, imoc debesonga ngic yeneac amma kengecyunuec. Nocac ngic yeni sasawango Yohane ye profete fora, ifi negenggec. <sup>33</sup> Imocac yeni Yesu meremmigec, “Imoc mi negendimbe.” degec Yesungo yofi merengyemmeec, “Ifi degec, ni ifingoc noc uayoacac kucfu ua mekecduae, imoc mi edengunubade.”

## 12

<sup>1</sup> Yesungo monggoc yoac heima yofi edeyunuec, “Ngic mongngo waing ua gboria mong homecma oda dzegeec. Dzegema waing tidzac tidzameac

teng usuma gareng yeneac kicfifiac amaherec meec. Meu wisickeu waing ua garenggegecdeac ngic meficyunuma yenigoc yoac dedzege anggec nga yengenaoc ine bangec hereau kenec. <sup>2</sup> Kemma kecmanu fora kpememe naso hau wanacngiha mong sueu waingngic yeneanunac waing uaac fora noboha yeac anec, imoc meudeac kenec. <sup>3</sup> Kensikemanu waingngic yeni wanacngic mema dzoboya kpema entegeng suegec kenec. <sup>4</sup> Kenu minginango wanacngic mong yenearu sueu kenu yeneng ye kpefuhama desofoc ammigec.

<sup>5</sup> Ifi ammigec ua minginango serima wanacngic monggoc mong sueu yenearu kenu ye kpehomegec. Kpehomegec ua minginango wanacngic homac sueyunuu kenggec ua ngic yeneng medac goa dzoboyunugec nga goa ine yunuhomegec. <sup>6</sup> Wisic wisickeau ua minginango songomedacyombonga mocgu kefec, ye yofi negemma sueec, 'Yeni sifu medacyombonna eweheimigecde.' <sup>7</sup> Ifi negemma sueu ua ngic yeneng ine medacyombonga hemma denegeng amma edeemegec, 'Yeng kecma ua yomoc tiu enude, imocac ngeni hagec kpeni bangeha nga maridzominga imoc nangan ambeso.' <sup>8</sup> Yeni ifi dema ua minginaac medacyombonga mema kpehomema farenga waing ua ngadeau ukugec kemema feec. <sup>9</sup> Anu ua minginango dafi anude? Ye hama waing ua ngic yunuhomema waing uaya imoc ua ngic areng mong yemmeude.

<sup>10</sup> Mitikibiu yoac yofi oho ohoya fede, 'Amameme ngic yeneng hoc mong mangana

dema ukugec. Nga hoc imocngo amaac hoc wotung amma seria nanude. <sup>11</sup> Nga faka imoc Kebu yengenaoc meu ngicngo hensongo ammidimbe.’ Ngeni yoac imoc osonegeng angandae.” *(Mitiyegec 118:22-23)*

<sup>12</sup> Nga Yesungo enara yeneac negemma yoac imoc heima deec, yeni imoc bic negenggec. Nga yeneng ye mendanggegecdeac sing ine hofocgec. Nacac yeni ngicngac yeneac kengecyunuu wama kenggec.

<sup>13</sup> Ngicenara yeneng Yesu tobanggegec yoacd-eudeau makpeu yoacfu faigecdeac negemma yofi anggec. Yeni farisaio nga Herodeac arenunac ngic goa yearu sueyunugec <sup>14</sup> yeneng Yesuaru hama degec, “Kpoukpou, yoac fora dema ngic engena me mamea yeneac mi negensianne. Ge ngicngac areng socfungoc ayemmekecne, imoc negendimbe. Nga ge Anutuac sing dindingac edekpou anemmekecne. Ifi anu ngictau Sisa takesi mibesonga me mi mibesonga, singngo dafi dede? Nenang ngictau Sisa takesi naric minide me kpac?”

<sup>15</sup> Ifi degec Yesungo ikocfakangina negentegecma yofi edeyunuec, “Ngeni nocac faitobannu fainudae? Ngeni dzo mong meficgema edzacnugec hembra.” <sup>16</sup> Ifi deu yeni dzo mong migec yeng imoc hemma yofi kpesiyemmeec, “Onga nga kibi yoc, imoc meracac?” kpesiyemmeu degec, “Imoc Sisaac.” <sup>17</sup> Ifi degec Yesungo yofi edeyunuec, “Imocac ngeni Sisaac wiac, imoc Sisa mibisia nga Anutuac

wiac, imoc Anutu mibisia!” Ifi edeyunuu negemma kpidohogec.

<sup>18</sup> Sadukaio areng yeni homecfunac yacyac mi fede, ifi dekecdae. Nga yeneacunac ngic goa Yesuaru hama kpesimigec, <sup>19</sup> “Kpoukpou, Mosengo dedeseriyoac yofi ohonemmeec, ‘Ngi mong ye ngac mema gboriha mong mi kpeficge kecma homeudeu ngac ye kefu muneango daraac hodzec mema gboric kpeficgema daraac kpac mi-acbeso.’ *(Dedeseri 25:5-10)*

<sup>20</sup> Naso monnu daramuna seweng yeni kecgec. Nga waracdacnginango ngac mong mema gboriha kpac kecma homeec. <sup>21</sup> Homeu muneango ngac imoc mema ye ifingoc gboriha kpac kecma homeec. Homeu munea mongngo faka imocngoc anec. <sup>22</sup> Nga daramuna seweng yeni ngac imocngoc mema gboricfocngina kpac kecma homedacgec. Homedacgec hodzecngina kecma ngade homeec. <sup>23</sup> Homeu ngic seweng yeneng ngac imocngoc megecac kecma yacyac nasou homecfunac yacgecde, imohai ngac imoc meracac enema anude?”

<sup>24</sup> Ifi degec Yesungo meremma yofi edeyunuec, “Ngeni mitikibi nga Anutuac kuc, imoc mi negentegecdae, imocac amma yoac desufudae. <sup>25</sup> Kecma homegec yeneng homecfunac yacgecde, imohai ngicngac yeni mi meemegecde. Nga manggac mongngo ‘Ni naroanna ngic mibade.’ imoc naric mi deude. Yeni imohai kurumenggac angero, yeni isoc anggecde. <sup>26</sup> Nga homecfunac yacyac deba, ngeni yoac yomoc Moseac kibiu



imoc osoandae, Mosengo icfu gerechorang fingeru hemma ihai kenu Anutungo yofi edeec, 'Ni Abrahang nga Isaka amma Yakobo, yeneac Anutu.' *(Makekeng 3:6)*

<sup>27</sup> Nga ye ngic homemea yeneac Anutu kpac. Ye ngic gbori kecdae, yeneac Anutu. Ngeni sing homac yombong segema kecdae."

<sup>28</sup> Anu Yesugoc demereng anggec, yeng turunga gombunga merengyemmeu mitiac negen negengngic yeneacunac mongngo imoc hemma Yesuaru hama kpesimiec, "Dedeseriyoac damocngo engena yombong ande?" <sup>29</sup> Ifi kpesimiu Yesungo yofi deec, "Dedeseriyoac engenangina yofi fede,

'Israengic ngeni negenggec, Kebu Anutunina ye mocgu nga <sup>30</sup> ge ubaherega nga ongaga amma negen negengga nga kucga sasawa, imoc hafoangoc Kebu Anutugaac heresongo negemma kecbesena.' *(Dedeseri 6:4-5)*

<sup>31</sup> Nga mong yofi,

'Ge geangga anggengande, siriha imocngoc ngicngac gegoc wegena kecdae, yeni heresongogoc hoangyunubesena.' *(Sesememe 19:18)*

Dedeseriyoac imoc yereac engena mong mi fede."

<sup>32</sup> Ifi deu mitiac negen negengngicngo merem-miec, "Gombunga kpoukpou, ge fora yombong denec. Anutu ye mocgu, mongngo ye isoc mi kecde.\* <sup>33</sup> Nga ubaherega hafoangoc nga negen negengga hafoangoc amma kucga hafoangoc

---

\* **12:32:** Yesaia 45:21

yeac songo heregoc negemma kecbesena amma geangga anggengande, siriha imocngoc ngicngac gegoc wegena kecdae, yeni heresongogoc hoangyunubesena, wiac imocngonoc Anutuac hosuc heihei amma sese hania hania ferahade.”

<sup>34</sup> Ngic ye gombunga yombong merenu Yesungo negemma yofi edeec, “Ge Anutuac eucererenggac hereau mi keccec.” Ifi deu yeni Yesu monggoc kpesimigecdeac kengecyunuu wagec.

<sup>35</sup> Yesungo Anutuac womonnu edekpou ayemmema yofi kpesiyemmec, “Mitiac negen negengngic yeneng Messia ye Dawidiac kisicfunac nocac deandae?” <sup>36</sup> Dawidi ye Asungo meefaiu yengenaoc yofi deec,

“KEBUNGO neac Kebu edeec, ‘Ge foinaugeng tacmana ngabafocga yeni hanigaac bageu faiyunubade.’ *(Mitiyegec 110:1)*

<sup>37</sup> Dawidi yengenaoc ‘Neac Kebu’, kparec. Nga Messia ye dafiu Dawidiac bangeha ande?” Ifi deu ngicngac habutoa yeneng negendzidziegoc.

<sup>38</sup> Ifi anggec Yesungo edekpou ayemmema yoac yofi torokpema edeyunuec, “Ngeni mitiac negen negengngic yeneac henghomema kecbisia. Yeni songonginaac amma ngakpi herea heima kecgec ngicngac yeneng wenacngerec deyemmegecdeac emenecfu kenghaandae. <sup>39</sup> Amma kpekpeturang amau nga yakatoa nasou warac warac tat- acfu tachesonga songongina angkecde. <sup>40</sup> Amma yeni ine ngachodzec yeneac ama wangecyunuandae. Amma negen ngereengunugecdeac nunumu herea here numuandae. Yeni ikocfaka ifia angandaeac turunga ebiriangoc megecde.”

<sup>41</sup> Anu Yesungo womonggac sesekatapa nobohau tacma henu ngicngac homacngo dzo imohai faigec kemeu ngic finactoagoc homacngo hama dzo ebiriangoc faigec kemeec. <sup>42</sup> Anu ngac hodzec mongngo ifingoc hama peni sacsac yohockang faiu kemeec, imoc toea mong kapi-anecsac. <sup>43</sup> Faiu Yesungo medacfora deu hagec yofi edeyunuec, “Foracngoc, ngac hodzec hiedzoya kpac yombong dzo faidacmoc, yeng ngicngac sasawa sese faidau, yeni feracyunude, imoc eden-gunuduae. <sup>44</sup> Ngicngac tosea sasawa, yeneng finactoangina wakema made, imohacnac sesengina faidau. Nga ngac ye ine wiac femidac, imocnoc hafoangoc faidacma entegeng kecde.”

## 13

<sup>1</sup> Anu Yesungo Anutuac womonnunac mama kemmanu medacfora yenearunac mongngo edeec, “Kpoukpou, hoc gombunga gombunga nga ama kuneng kuneng tackende, imoc henna.” <sup>2</sup> Ifi deu Yesungo yofi edeec, “Ama kuneng kuneng tackenu hennec, imoc kecma naso mong haude, imohai wasaingic yeneng imoc sasawa hembarackegecde. Hembarackegec hoc mongngo monggac witiau wagec mi tarude.”

<sup>3</sup> Yesungo Oriwa tikiu Anutuac womong kiwa dindingacfu tacmanu Petoro nga Yakobo amma Yohane nga Anderea, yeneng yegoc tembuclu kecma kpesimigec, <sup>4</sup> “Ge yoc dedang, imoc noc nasoac fingerude nga naso imohai noc soi fingemanu yoc sasawa imoc seriude?”

<sup>5</sup> Ifi degec Yesungo yofi edeyunuec, “Ngic mongngo ikocfu wangepngunubacac ngeni

henghomema kecbisia. <sup>6</sup> Ngic homac yeneng hama neac kpac kpacma degecde, 'Ni Messia.' ifi dema ngicngac homac uba mesufu ayammegecde.

<sup>7</sup> Dzikactoaac siduc bangec wegenaunac nga bangec hereaunac hau ngeni imoc negemma mi kpidohobisia. Foracngoc, faka ifia fingecheso. Nga naso wisic wisickea ine imohai bic mi haude. <sup>8</sup> Bangecareng goa yeneng bangecareng ogofocnginagoc dzikac kpema kegcgecde. Nga ngictau monggac arengngo ngictau monggac areng yenigoc ngaba angemegecde. Bangec monnu nga monnu usoc meude amma bodinaso fingeckenude. Nga faka yomoc, imoc wiac gboria fingecheso andeac ngac gadze kiude ifi isoc ande. <sup>9</sup> Imocac ngeni ngenaocngoc garengemema kecbisia. Ngic yeni yocafu faingunugecde amma kpekpeturang amau dzikacngo ngunugecde. Amma yeni neac amma ngictau nga gawana yenearu yocafu faingunugec ngeneng ihai namma ni dekperaginubisia.

<sup>10</sup> Ngeni bangeha bangeha ngicngac siduc gombung edekpou ayammegec negendacgecguc <sup>11</sup> ngic mengunuma ngic goa yeneac mariu faingunugecde, ngeni naso imohai, 'Dafi denide?' dema mi negengebiribisia. Tiri Asungo naso imohai yoc enacnginau faiude, ngeni imoc debisia. Ngeni yoc imohai degecde, imoc Tiri Asuarunac ambeso. <sup>12</sup> Anu dac mongngo munea enara yeneac mariu faiu yeneng homecfu faigecde nga manggac mongngo medahaac imocngoc anude. Nga nambarac yeneng

nonggo mangfocngina deendema ayemmema homecfu faiyunugecde. <sup>13</sup> Nga ngicngac sasawa yeneng neac kpacnaac amma ngeni ubango ukungunugecde. Nga ngic mong ye seserigoc kecmanu nasotoa haude, yeng komoc kpeude.

<sup>14</sup> Anu ngic mong ye yoac yomoc osoude, yeng imoc negentegebeso. Wiac mangac manganea wiac sasawa kpetotieude, imocngo ama kpaeagocfu emma nanu henggecde,\* faka imoc fingeru ngicngac Yudaia bangecfu kecdae, ngeni worama tikiu embisia. <sup>15</sup> Nga mong ye ama witiau tacde, ye kemema ama manau emma wiac mong mi mebeso. <sup>16</sup> Nga mong ye semeng uau nande, ye ngakpi hereha meudeac mi dzi-genebeso. <sup>17</sup> Amma ngac heregoc kecdae nga nenggac sabac namuu meyunukecdae, yeni naso imohai ebictoanginagoc anggecde.

<sup>18-19</sup> Naso imohai kpendzeng kuneng siriha mong yombong figerude. Anutungo hanac hana-heaunac bangec sasawa meficgeecfunacngoc erema yaguc kecdimbe, naso imocac manau kpendzeng ifia mong mi fingerec amma ngade naric mi fingecebesande. Imocac amma ngeni wiac imoc nomannasou mi fingerudeac numubisia. <sup>20</sup> Kebungo naso imoc mi mewegenebac dede ngic mongngo komoc naric mi kpebac. Ngic meisingyunuyunuya, yeneac amma naso imoc bic herec herecgea fede.

<sup>21</sup> Naso imohai yoac yofi fingerude, 'Henggec, Messia yei fingece.' me, 'Ye edi fingece.' Ngicngac ifi degecdeu ngeni mi

---

\* **13:14:** Imoc ama kpetiac. (Danie 9:27; 11:31; 12:11-13)

negensingyunubisia. <sup>22</sup> Imoc yofiac, ngicngac fingeema ikoc amma degecede, 'Ni Messia.' yeni nga profete ikoha yeneng fingeema ngicngac uba mesufu ayemmegecedeac ngicngac tobangyunuma faka kuhagoc nga morora megecede. Amma yeni sing meficgegecedeu ngicngac meisingyunuyunuya ifingoc ikocfu wangecyunugecede. <sup>23</sup> Faka sasawa imoc mi fingeemanu imoc bic edengunuduae. Ngeni imocac negemma henghomebisia.

<sup>24</sup> Anu kpendzeng imoc wisickemanu imohai 'wenackiwa kundung kpeu afokperagia mi fingerude. <sup>25</sup> Nga asomeng yeni kurumenunac fotockema magec kurumenga kurumenga yeneac kuc sasawa kpemindzagegecede.' *(Yesaia 13:10; 34:4)*

<sup>26</sup> Naso imohai ngeni Ngicac Medac henggec yeng kuctoaya nga kibikperagitoayagocngo hoennu haude.† <sup>27</sup> Hama angerofora sueyunuu bangec nga kurumeng tegia noboc noboc wisickede, imohai kenggec yengenaoc ngicngac meisingyunuec, yeni kpedzucyunugecede.

<sup>28</sup> Fig icngo hania edekpou angemmeu ngeni imoc negenghomebisia. Fawaya doku doku amma besaiu ngicngeni yofi negengandae, wenac naso ande. <sup>29</sup> Nga ngeni wiac dedua, imoc fingeru hemma ifingoc yofi negembisia, Ngicac Medac nasoya bic wegenema hama nagu ngadeau nandenoc. <sup>30</sup> Foracngoc, areng yomoc ngeni mi homemagec wiac yomoc fingeedarude, imoc

---

† 13:26: Danie 7:13

edengunuduae. <sup>31</sup> Foracngoc, bangec nga kuru-meng yeri kecma kpac anecde nga neac yoac ine mi kpac anude.

<sup>32</sup> Nga faka imoc noc uamemeu amma aua nofu fingerude, imoc mongngo naric mi negenude. Kurumenggac angero yeni imoc mi negenggecde nga Medacngo ifingoc mi negenude. Manggacngosac naso imoc negende. <sup>33</sup> Ngeni garengngina mema ubagbori kecbisia. Nocac ngeni naso mi negendae.

<sup>34</sup> Imohai faka yofi isoc fingerude, ngic mongngo amea wama bangec monnu kenudeac negenec. Ifi amma ye amagareng wanacngicfora amaac wiac uanginaacsoc garenggegecdeac uayoac deyemmema nagugareng nagu kicfifi nanudeac edeec. <sup>35</sup> Imocac ngeni ubagbori kecbisia. Minginango ama toforemanu me tofocnac dzongiau me ama werec wereckenggac me asoac nasou dzigeneude, ngeni imoc mi negendae. <sup>36-37</sup> Ngeni gaufemagec hama ngenembacac yoac yomoc ngeni nga ngicngac goa sasawa edengunuduae. Ngeni imoc negemma ubagbori kecbisia.”

## 14

<sup>1</sup> Makekenggac naso nga ic sogong yisya kpac nene, imocac hombanggac uameme yohockang feec. Femanu womong gareng enara nga mitiac negen negengngic yeni Yesu nofusing kic mesufu ammima mema kpegec homeudeac sing hofocma <sup>2</sup> yofi degec, “Ngcngac yenearu dzikac sicsauc fingebacac amma ye hombang nasou mi mebesonga.”

<sup>3</sup> Anu Yesungo Betania amau ngic mong kpara Simong kubecserigoc, yeac amau yaka netarec. Netacmanu ngac mongngo alabastros kirung\* mong kerecdoku homung kerengagoc metarec, imoc mehaec. Doku imoc narda foraunac memea amma buma engena yombong. Ngacngo imocnoc mehama kirung ubea kpetackema Yesuac oruhau kpakema nadzicmiec. <sup>4</sup> Nadzicmiu ngic goa ihai tacgec, yeneng imoc hemma dehesi amma degec, “Ye nocac wiac buma engena ifi kpedzonggede?”

<sup>5</sup> Doku homuna gombunga ifiango kifa mocguac uabung† ferahema kirecgeu yeni imoc ngicngac makpekpea yemmegec ngereebac.” Ifi dema ngac yoac gereagoc ammigece.

<sup>6</sup> Ifi ammigece Yesungo yoacngina negemma yofi edeyunuec, “Ngeni nocac ngacac ifi degec ubaebic meficgeude? Ngeni faka imoc wagec. Ye faka gombunga yombong anende. <sup>7</sup> Ngic makpekpea yeni nasosoc ngenigoc kecgec ngeni meficyunubeso angemmeu naric meficyunukecgecde. Nga neng ine ngenigoc nasosoc mi kecbade.

<sup>8</sup> Ngac yomocngo sebina doku homunagocngo nadzicmiu ngeni farena tonggogecde, imocacnoc yeng hanahema meefainude. Meefainuma yeac uaareng fede, imoc bic mesiude. <sup>9</sup> Foracngoc, ngicngac yeneng siduc gombung bangectoa bangec, imohai kemma ngicngac edekpou ayemmegecde, imohai ngac yomocngo faka anec, imoc ifingoc degec negenggec feude, imoc edengunuduae.”

---

\* **14:3:** Alabastros kirung imoc hocngo memea nga ubahereagoc amma tapea kpac. † **14:5:** Ye 300 denari deec.



<sup>10</sup> Anu medacfora <sup>12</sup> yenearunac mong kpara Yuda Karioto amaunac, yeng Yesu meyemmeudeac dema womong gareng enara yenearu kenec. <sup>11</sup> Kenu yeni ubangerec negemma dzo migeceac degec. Ifi degec Yudango naso gombung damohai Yesu doc mema yereac mariu faiude, imocac kicfifi kefec.

<sup>12</sup> Ic sogong yis kpac, hombang imocac hanac hanaheau makekenggac ramamedaha kpeherecege angandae, naso imohai Yesuac medacfora yeneng Yesu kpesimigec, “Neni dahai kemma makekenggac ramamedaha nenideac memengere annideac negennec?” <sup>13</sup> Ifi kpesimigec yeng medac yohockang yofi dema sueyuruec, “Ngeri taonnuu emma ngic mong dokuenanga tofohoma hau yegoc ewacma ye modachesera. <sup>14</sup> Modarec kemma amau enude, ama imohai ama mingina yofi edebesera, ‘Kpoukpoungou yofi kpesigende, “Ama mana damohai mengerenenna ni medacfocnagoc makekenggac ramamedaha nenide?” ’ <sup>15</sup> Ifi deec yeng ama witiau amamana mong kuneng ihai wiac bic mengec mengerea tacdacde, imoc edzacnguruu ngeri imohai iwainina mengerebesera.” <sup>16</sup> Ifi deu medac yeri ama wama taonnu enoc. Emma Yesungo edeyuruec, imocac sirihau wiac meficgedacma makekenggac ramamedaha ohomengere anoc.

<sup>17</sup> Anu ama toforemanu Yesu nga medacfora <sup>12</sup> yenigoc kensikegec. <sup>18</sup> Kensikema yaka netacma Yesungo yofi deec, “Foracngoc, ngenearunac mongngo ni ngaba yeneac mariu fainuude,

yennoc nigoc yaka nede, imoc edengunuduae.”

<sup>19</sup> Ifi deu medac yeni negengebirima tembuc tembuc kpesimigec, “Ge imoc neac denec me?”

<sup>20</sup> Ifi degec, yeng yofi merengyemmeec, “Imoc medac 12 ngenearunac mong anu yeng nigoc ic sogong terau nemuruckede.

<sup>21</sup> Ngicac Medac ye wangunuma kenude, imoc neac negemma oho ohoya bic fede. Nga ngic ye Ngicac Medac doc meude, ye ine sowehagoc. Ye nonggeaac here manaunac mi fingeccbacfu efaibac.”

<sup>22</sup> Anu netacmagec Yesungo ic sogong mong mema Anutu ubangerec edema ic sogong imoc mendzicma medacfora yemmema yofi deec, “Ngeni yomoc megec, imoc fusina.” <sup>23</sup> Ifi dema kpakenec mong mema Anutuac ubangerec dema sasawa yemmeu negec. <sup>24</sup> Negec yofi edeyunuec, “Yomoc neac sac, imocngo dzadzahac amma imoc ngicngac homac yeneac amma kpetic kpetinggea. <sup>25</sup> Foracngoc, ni waing gbomeaac dokuya monggoc mi nene kecbarengoc Anutuac eucerereng manau waing gboria nebade, imoc edengunuduae.” <sup>26</sup> Anu yeni Anutuac yegec heigec,‡ Heima taong wama Oriwa tikiu enggec.

<sup>27</sup> Emma Yesungo yofi edeyunuec, “Ngeni sasawango neac negemmangang amma wanugecde, imoc yofi bic oho ohoya fede.

‘Ni ramagareng kpeba yeni sasawango sinsararang kpegecde.’ (Dzekaraia 13:7)

<sup>28</sup> Anu neng ine gborima yacma waraingem-mema Gariraia bangecfu kembade.” <sup>29</sup> Ifi deu

‡ 14:26: Yegec, imoc Mitiyegec 115-118.

Petorongu deec, “Ngicngac sasawango negem-mangang amma wagugecdeu neng ine imoc naric mi ambade.” <sup>30</sup> Ifi deu Yesungo yofi edeec, “Foracngoc, yaguc tofocnac kokorecngo arohou atac yohockang mi ammanu geng neac busickpena harebec bic anude, imoc edeguduae.” <sup>31</sup> Ifi deu Petorongu serimangoc deec, “Ni gegoc homebade isoc sebi ine naric mi heibade.” Ifi deu ogofora yeni sasawango imocngoc degec.

<sup>32</sup> Yesu nga medacfora yeni ua bangec mong kpara Gedzemanu, imohai kenggec. Kensikema yeng medacfora yofi edeyunuec, “Ngeni yei tacmagec ni numubade.” <sup>33</sup> Ifi dema Petoro nga Yohane amma Yakobo meyunuu kenggec. Kemma negen negenga fonggou negengebirima <sup>34</sup> yofi edeyunuec, “Ubaonganango ebiriyombonggeu homebeso anende, imocac ngeni yei garengngina meemema tacgec.” <sup>35</sup> ifi dema kpesima kemma bangecfu makpefema yofi numuec, “Imoc naric anu naso imocngo feracnubeso.” ifi <sup>36</sup> numuma yofi deec, “O Manggac manna, gearu wiac sasawa imoc efea. Ge kpakenec yomoc wangecnuna. Anu neac songo ine mi seribeso, kpac. Geac songo nga negen negeng imoc seribeso.”

<sup>37</sup> Ifi numuu wisickeu dzigenema medacfora yenearu hama yenenu yeni gau fegec Petoro yofi edeec, “Simong, ge gau fenec, ge naric aua mocguac manau gaugbori kecbang me? <sup>38</sup> Nga faitobannu embauac ngeni ubagbori kecma numugec. Ongaasungo efaide nga sebingo ine ebiride.”

<sup>39</sup> Ye ifi dema monggoc kemma nunumu imoc-

ngoc numuec. <sup>40</sup> Numuma hama yenenu yeni monggoc gau fegec. Nocac yeni kicngina ebiriec. Nga ye yoac deu yeni meremmigecdeac obohogec. <sup>41</sup> Nga ye atac harebecfu dzigene hama yenemma yofi deec, “Ngeni gau femangoc kecdae, imoc naric mi ande. Yaguc ine wisickede nga naso bic hadac. Negenggec, ngic yeni Ngicac Medac kererema kopocsicmeme yeneac mariu faigecde. <sup>42</sup> Benukererec ngicngo hadeac amma ngeni yacgec kenni!”

<sup>43</sup> Anu Yesu ye ifi demanungoc medac 12 yeneearunac mong Yuda, yeng hau habu kunengngo wasaibeang nga gbarucnginagoc ye modacgec. Anu yeni womong gareng enara nga mitiac negen negengngic amma yudangic enarafocngina sueyunugec, yeneearunac hagec. <sup>44</sup> Hagec benukererec ngicngo yofi derecgeyemmeec, “Ni ngic muduckebade, ngeni yenoc mendanggema garenggeyombonggema mekembisia.”

<sup>45</sup> Anu Yuda ye hama Yesuaru bic kemma, “Kpoukpou.” dema muduckeec. <sup>46</sup> Muduckeu yeni Yesu maria noboc noboc mema mendangegec.

<sup>47</sup> Mendangegec medac yeneearunac mongngo ine wasaibeang kpedzima womong garengtoaac wanacngic kpema kedzaha noboc herecgeec. <sup>48-49</sup> Nga Yesungo yofi edeyunuec, “Ni wenacsoc ngenigoc kecma womonnu edekpou angemmeba ngeni imohai ine mi menugec. Nga yaguc ine godzungic meandae, ngeni ifi isoc wasaibeang nga gbaruc mema menugecdeac hadae.” Yoac mitikibiu fede, imoc sasawango ine

fingecdacbeso.

<sup>50</sup> Yesungo ifi deu yeac areng sasawango ye wama kengec woragec.

<sup>51</sup> Anu sebigborimedac mongngo kporuc linengngo memea imocsac kpeec, yeng Yesu modaru megec. <sup>52</sup> Memagec, yeng kporuc kpesima senggang worama kenec.

<sup>53</sup> Anu yeni Yesu mema womong garengtoa yenearu mekenggec. Mekenggec womong gareng enara sasawa nga enarafocngina amma mitiac negen negengngic, yeni kpeturanggema hagec.

<sup>54</sup> Nga Petoro ye ngadenginau hereaungoc modacyunu kemma womong garengtoa yeac amaac oda manaungoc enec. Emma imohai uamedac yenigoc geric dzeunegemma tarec.

<sup>55</sup> Anu womong gareng enara nga yudangic yeneac tutumangtoa memba sasawa adzoragec. Adzoroma yeni Yesungo faka mangana dafi anec dema kpehomegecdeac manganaac kopocsicac yoac anggecdeac obohogec. <sup>56</sup> Nga ngic homacngo ikoc amma yeac enacfu faifaiyoac degec nga gubeyoacnginango socfungoc mi anec. <sup>57</sup> Ngic goa yeneng kicnginau emma namma yofi dema enacfu faifai ammigec, <sup>58</sup> “Ye yoac mong yofi deu negening, ‘Ni womong yomoc ngicmaringo memea, imoc hembarackema uameme harebecac manau mong ngicmaringo mi memea mebade.’”

<sup>59</sup> Nga kopocsicac yoacngina imocngo ine ifingoc socfu mi anec.

<sup>60</sup> Anu womong garengtoango yacma botucnginau namma Yesu yofi kpesimiec, “Geac yoac dedae, imocac noboha mong mi denade me?” <sup>61</sup> Ifi deu Yesungo ine waicke namma turunga mong mi

merennec. Nga womong garengtoango monggoc kpesimiec, “Ge Messia, Kenec keneheac medac me?” <sup>62</sup> Ifi deu Yesungo deec, “Ni imocnoc. § Anu kecma ngeni Ngicac Medac Kuctoa mingina yeac foiaugeng tacma kurumenggac hoennu kicnginau hau henggecde.” *(Mitiyegec 110:1; Danie 7:13)*

<sup>63</sup> Ifi deu womong garengtoa yeng ngakpihereha membarackema deec, “Yoacninaac boingiac monggoc mi obohonide. <sup>64</sup> Ye Anutu emmima deu bic negendau, imocac dafi negendae?” Ifi deu sasawango ye kopocsihagoc negemma homeudeac deserigec.

<sup>65</sup> Ifi deserigec ngic goa yeneng sofohoma kiwa kporucngo biranggema marigbung gbungngo heima degec, “Ge kpefingyoac dena!” degec gareng nanggec, yeneng ye mema kpegec.

<sup>66</sup> Anu Petorongo oda manau nammanu womong garengtoaac wanac naroang mongngo ihai haec. <sup>67</sup> Hama henu Petoro ye gerec dzeu-negemma taru kiwa yearu fima deec, “Ge ifingoc Yesu Nadzaretenac, yegoc kefoc.” <sup>68</sup> Ifi deu Petorongo ine sebi heima deec, “Ye mi negemmiduae nga yoac denec, imoc mi negentegecduae.” Ifi dema ama naguyau kemeu kokorec arohoec. <sup>69</sup> Arouhou wanac naroangngo Petoro hemma ngic wegenac nanggec, torokpema yeni monggoc edeyunuec, “Ngic yomoc ye yenearunac mong.” <sup>70</sup> Ifi deu Petorongo ine monggoc busick-peec.

Nga naso mi hereemanu ngic imohai

---

§ 14:62: “Ni imocnoc.” imoc Anutuac kpara mong. Ge “Yoac goaac dedekperagi.” henna. Hafac 1128.

nanggec, yeneng monggoc degec, “Foracngoc, ge yenearunac mong. Ge Gariraia bangecfunacngoc.” <sup>71</sup> Ifi degec ye yengenaoc sowecemema desopec amma deec, “Ngeni ngic dedae, ye mi negemmiduae.” <sup>72</sup> Ifi deu imohaingoc kokorecngo arohou yohockang anec. Anu Petoro ye Yesungo yoac edeec, imoc negensiec, “Kokorecngo arohou atac yohockang mi ammanu geng neac busickpena harebec bic anude.” Petorongo imoc negensima ubahodung kuneng mema kiachodung kiarec.

## 15

<sup>1</sup> Asoacngoc yombong womong gareng enara nga yudangic enarafocngina amma mitiac negen negengngic nga yudangic yeneac tutumangtoa memba sasawa, yeneng yoac deserigec. Deserima Yesu maria dedeckema Piratoaru mekenggec. <sup>2</sup> Mekenggec Piratongo Yesu kpesimiec, “Ge yudangic yeneac ngictau me?” ifi deu merenec, “Imocnoc geanggaoc denec.”

<sup>3</sup> Nga womong gareng enara yeneng Yesu yoacfu faima yeac haniaya homac degec. <sup>4</sup> Ifi degec Piratongo monggoc kpesimiec, “Yeni geac yoac homac yombong dedaemoc, imoc negemma turunga mong mi merennade me?” <sup>5</sup> Ifi deu Yesungo turunga monggoc mi merenu Piratongo negen negeng ua homac meec.

<sup>6</sup> Anu makekeng nasousoc ngic mong witicamau takefu yudangic yeneng yeac kpara kpacgec Piratongo yenoc witicamaunac wau makefec. <sup>7</sup> Amma ngic goa warac ngicngac here miac miac faka amma ngic goa yunuhomegec witicamau

faiyunugec, yenearunac ngic mong kpara Baraba. <sup>8-10</sup> Nga womong gareng enara yeni Yesuac keracmangang amma yeac mariu mekenggec, Piratongo imoc bic negenec. Ifi negenu habutoa yeneng hama Piratongo angkefec, ifi isoc anudeac kpesimigec yeng meremma yofi kpesiyemmeec, “Yudangic ngenec ngictau yungecngemebadeac negendae me?” <sup>11</sup> Ifi deu womong gareng enara yeneng habu fenggeyemmegec yeneng Yesu wama ine Baraba naric yungecyemmegecdeac degec.

<sup>12</sup> Ifi degec Piratongo monggoc meremma kpesiyemmeec, “Anu ni yudangic ngenec ngictau dedae, yeac dafi ambade?” <sup>13</sup> Kpesiyemmeu yeneng arohogec, “Ge ye mariponnu kpena homeu.” <sup>14</sup> Ifi degec Piratongo monggoc kpesiyemmeec, “Nga ye noc kopocsic meec?” deu ine yeneng monggoc seriangoc arohogec, “Ye mariponnu kpebesena.” <sup>15</sup> Ifi degec Piratongo habu yeneac negen negeng modarudeac negemma Baraba wau kenec. Nga yeni Yesuac sebia dzikacngo kpemaguc mariponnu kpegecdeac wasai maringinau wayemmeec.

<sup>16</sup> Anu wasaingic yeneng Yesu mema gawamang yeneac amaoda manau emma wasaingic sasawa hafoangoc kpedzucnegec. <sup>17</sup> Kpedzucnedacma ngakpiherec mong giweng giweng heimima somang batihema ira isoc oruhau heimigec kemeec. <sup>18</sup> Kemeu ewehihehi siricfu kpacma edegec, “Ohec, yudangic yeneac ngictau.” <sup>19</sup> Dema yasungo oruhau kpema sofohoma haniau fafoc heima numumigec. <sup>20</sup> Anu



yeni defagoc ammigec wisickeu ngakpiherec saccac imoc hesima yengena wamba heimigec kemeu mariponnu kpegecdeac mema ngadeau kenggec.

<sup>21</sup> Kemmagec Kirene taonnunac ngic mong kpara Simong, ye Aresande nga Rufu yereac mangngira, yeng semeng uaunac sinnu hamanu wasaingic yeneng Yesuac maripong tofohoudeac ngombonggegec tofohoec. <sup>22</sup> Tofohou yeni bangec buma mong kpara Gorigata, titiha hatasic, imohai Yesu mekenggec. <sup>23</sup> Mekemma sopo mong aengagoc kpara mira, imoc wainggoc yerecgema migec nga yeng ine imoc waec.

<sup>24</sup> Anu yeni ye mariponnu kpema wambaya mederema wiac mong me mong merang meude, imocac kpeing kpegec. <sup>25</sup> Yeni asoac 9 kirocfu Yesu mariponnu kpegec. <sup>26</sup> Kpema ye yoacfu faigec, imocac hania tafebisicfu yofi ohogec, “Yudangic yeneac ngictau.” <sup>27-28</sup> Anu yeni godzungic yohockang, mong foiau nga mong kanayau yegoc mariponnu momoc yunugec. Ifi anggec yoac mitikibiu oho ohoya yomoc seriec,

“Ye manganameme yenearunac mong, ifi nenggec.”  
(*Yesaia 53:12*)

<sup>29</sup> Anu ngic ihai kengha anggec, yeni Yesu deendema ammima orucngina kpatitickema degec, “Ngeni ngic imoc henggec, yeng womong hembarackema wenac harebecac manau monggoc meudeac deec. <sup>30</sup> Ge geanggaoc onggongemema mariponnunac mesiemema mana!”

<sup>31</sup> Anu womong gareng enara nga mitiac nengen negengngic, yeneng ifingoc ye desusuic amima denegeng amma degec, “Ye ngic goa ong-gongyunukefec nga yengena ine naric mi ong-gongemeude. <sup>32</sup> Ye Messia, Israe neneac ngictau kecdengo yaguc mariponnunac mau hemma negensinggenide.” Nga ngic yohockang mariponnu ifingoc yurugec, yereng ifingoc deendema ammioc.

<sup>33</sup> Wenac dzongiau 12 kiroc ammanu imohai ama kundung kpema kundungngo bangec sokoma fekemmanu 3 kiroc marai anec. <sup>34</sup> Imohai Yesungo ubaudumeng kunengngoc kpacma yofi deec, “Eroi, Eroi rama sabaktani.” Imocac titiha yofi, “Anutuna Anutuna, ge nocac wanudang.” *(Mitiyegec 22:1)*

<sup>35</sup> Ye ifi kparu ngic wegenac nanggec, yenearunac goango imoc negemma degec, “Negenggec, ye Eria kpac sambic ammidide.”

<sup>36</sup> Ifi degec ngic mongngo nedzikiemma kundung sobing mong mema waing aengagocfu nemuruckema yasuu faiu Yesuac enarau enu deec, “Tomai namma henni, Eriango hama mesiude me kpac!” <sup>37</sup> Ifi demanu Yesungo ine ubaudumeng kunengngoc kparu asuya ereec. <sup>38</sup> Ereu womong-gac kporuc kuneng\* imoc dzongiausing wihacnac tohoma mau yohockang anec.

<sup>39</sup> Anu wasaigareng yeac kicfu nanec, yeng Yesungo kparec nga homeec, imoc hemma yofi deec, “Foracngoc, ngic yomoc ye Anutuac medac-noc.” <sup>40</sup> Nga ngac goa ifingoc hereau namma faka

---

\* **15:38:** Kporuc imoc ama kpetiac nga ama kpetiac yombong, yereac botucngirau faifaia.

fingerac, imoc henggec, yeneac botucfu Maria kpara mong Madara nga Maria, Yakobo mong munea deandae, ye nga Yosec yereac nonggon-gira amma Sarome, yeni yenhafoc nanggec. <sup>41</sup> Yesungo Gariraia bangecfu kefu ngac imoc yenennoc ye modacma meficgekegec. Amma ngac tosea homac, yeni Yerusarennu yegoc bic kemma ihai ye hemma nanggec.

<sup>42</sup> Marai bic anu hombanggac memengereac naso wegene hau sabataac naso femanu <sup>43</sup> Yosefe Arimataia taonnunac, yeng ihai haec. Ngic ye kpactoyagoc yudangic yeneac tutumangtoa, imocac membangina mong amma ye Anutuac eucererenggac tomai kefec. Yeng kengeha kpac Pira-toaru kemma Yesuac fareng meudeac kpesimiec. <sup>44</sup> Kpesimiu Pirato ye Yesungo bic homeec, imocac kpidohoma wasaienara kpacma Yesu bic home-dac me kpac, imocac kpesimiec. <sup>45</sup> Kpesimiu Yesu bic homedac deu Yesuac fareng Yosefe desimiec.

<sup>46</sup> Desimiu Yosefengo linengkporuc mong bummema Yesuac farenga mariponnunac mesiu mau kporucngo tembonggema kicsereu mekenec.† Kicsere imoc hocsirau singa usu usuya, imohai farenga faima hoctoa mong kpedidinggeu singa hedzickec. <sup>47</sup> Anu Maria Madara nga Maria Yosec nonggea, yereng Yesuac farenga dahai faiec, imoc henoc.

## 16

<sup>1</sup> Sabata tatac naso wisickeu imohai Maria Madara nga Maria Yakoboac nonggea amma

---

† **15:46:** Lineng imoc kpindzing mong ambiac ogea, imocngo wamba mekegec.

Sarome, yeneng kemma Yesuac fareng nadzicmigeceac kerec homunagoc bummegec. <sup>2</sup> Bummema sonda gboria hanac hanaheau asoacngoc ama wereckenu kicsereu kemmagec wenac ereec.

<sup>3</sup> Anu kemma yenaocngoc denegeng amma degec, “Merang hocsingaac naguya imohacnac hoc kpedidinggenemmeude?” <sup>4</sup> Ifi dema kic fima henggec hoctoa imoc ine bic kpedic kpedidinggea. Nga hoc imoc kunengtoa yombong. <sup>5</sup> Hemma kicsereu emma henggec medac mongngo ngakpi-heraha kongac kongac mong heiec, yeng foiugeng taru hemma kpidohoma kerectegec anggec. <sup>6</sup> Ifi anggec yeng yofi edeyunuec, “Ngeni mi kengec-ngunuu. Yesu Nadzaretenc mariponnu kpegec-moc, ngeni ye hembeso hadae nga ye bic gborima yacdac, yei mi fede. Faigec fedac, fefea imoc henggec. <sup>7</sup> Ngeni kemma medacfora nga Petoro yofi edeyunuec, ye waraingemmema Gariraia bangecfu kende. Anu ngeni imohai kemma ye meficgegec, yengenaoc edengunuec, ifi isoc.”

<sup>8</sup> Ifi edeyunuu yeni kpidohoma dzonongngina fedeecac kicsereunac worama kenggec. Amma yeni homac yombong kpidohoma kengecyunuec amma ngic mong mi edeyunuec.

<sup>9</sup> Yesungo sondau yarec, naso imohai hana-hema Maria Madara fingeccmiec. Ye warac hade-hade 7 yearunac kporarec, ngac imocnoc fingeccmiec. <sup>10</sup> Fingeccmiu Mariango kemma ogofora yegoc momoc keccec, yeni ubahodung negemma kiac keccmagec yofi edeyunuec, <sup>11</sup> “Yesungo bic yacdac keccde, ni hendua.” ifi deu yeneng ye mi negensinggegec.

<sup>12</sup> Anu imocac ngadeau ngic yohockang yeri amabangec monnu kembesonga kemmaec ye sir-  
iha mong amma fingecyemerec. <sup>13</sup> Fingecyemeru  
yeri dzigenema goa edeyunugec, yeneng ine mi  
negensinggecec.

<sup>14</sup> Anu medacfora 11 yeni yaka nema tacmagec  
Yesungo fingecyemmeec. Nga ye yarec hemma  
edeyunugec, imoc mi negensinggecec nga ubang-  
ina seriecac amma ngaba siricfu yoac edeyunuec.  
<sup>15</sup> Edeyunuma yoac yofi deec, “Ngeni bangectoa  
bangec, imohai kemma wiac sasawa Anutungo  
deu fingerec, yeni siduc gombang edekpou ayem-  
mebisia.

<sup>16</sup> Anu ngic me ngac mong negensinggema  
mitidoku nadziru Anutungo ye ebicfunac me-  
siu komoc kpeude. Nga mong ye mi negens-  
inggeude, yeng ine yoacfu makpeude. <sup>17</sup> Nga  
negensinggegecede, ngenearu faka kuhagoc yofi  
fingerude. Ngeni neac kpacfu hadehade nga yaf-  
ing kporacyunugecede amma nedzarangyoac uba  
gboriausing degecede. <sup>18</sup> Ngeni boidzoc maringo  
megecede nga doku hodungagoc ngic meman-  
ganeyunuande, ngeni imoc negecede, imocngo  
mi memanganengunuude. Nga ngeni ngicngac  
hafeigoc yenearu mari faigec, yeni ngeregecede.”

<sup>19</sup> Kebu Yesungo yoac ifi edeyunuu wisickeu  
Anutungo ye kurumennu meenu yeac foiau tacde.

<sup>20</sup> Anu medac yeni noboc noboc kemma siduc  
gombang ngicngac edekpou ayemmegec. Nga Ke-  
bungo yenigoc kefu yeni ua megec faka kuhagoc  
fingerec, imocngo yoara meseriec.

**Yoac kekehagocac Dzadzahac gboria nga  
Mitiyegec  
The New Testament and Psalms in the Dedua  
Language of Papua New Guinea  
Buk Baibel long tokples Dedua long Niugini**

copyright © 2005 Wycliffe Bible Translators, Inc.

© 2012 Wycliffe Bible Translators, Inc.

Language: Dedua

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 3 Mar 2023 from source files dated 9 Oct 2020

19b7c48c-f4ce-5007-838d-58f01dc01ecc